

道光肇慶府志

肇慶府志

人物五 列女三

國朝

周德沛妻王氏庠生賓臣女周產素饒及翁沒族人利之順治十一年乘寇亂殺德沛兄弟氏年二十無子以姑在忍死後寇復掠村毀廬踞產垂十餘年氏取十之一爲祀田餘以散宗族之貧者

吳志

陳氏二烈女曰阿丑者生員宗大女年十七受胡氏子聘而夫亡曰阿帶者丑從妹也年十六未字俱有志操順治十三年冬李常榮刦磨柞村兩女被掠舟中義不受辱潛解足帛聯繫赴水死越數日浮出面色如生父母葬於雙賈沙岸

通志

生員譚布機女五歲許字林氏子未笄聞夫夭絕粒食數日後父母欲爲別字嚴詞拒之乃歸林奉舅姑甚恪後遇飢舅姑父母皆歿兄弟離散乃依舅氏家食力自守年三十七而卒葬之日有鶴數十繞墓終日人咸異之

同上

貢士李上桂妻梁氏上桂家貧力學梁脫簪珥佐之夫歿無嗣矢志孝養舅姑未幾舅沒家益落苦守三十餘年姑年踰九十梁忽遭疾不起彌留時猶力持姑衣以不能代夫終養爲恨聞者哀之

縣志

梁基府志妻沙氏性閒靜通書史年二十五夫亡沙上事老姑下撫幼子篝燈課讀三子於沐昌沐紹沐俱名列膠庠諸孫有登賢書者

黃登進女性至孝兄夭母亡父染癰病願終身奉養及父卒

仍守貞不字紡績自給

俱同上

何偉儒妻劉氏少失怙恃養於伯叔年十五歸何生子青蓮而偉儒逝劉誓不他適績麻課子及青蓮列於庠劉猶督之不輟

蘇浩妻梁氏年十八于歸二十一浩故氏哀痛幾不欲生養姑育子孀守二十九年雍正四年旌子楸豫貢生

林瑞玉妻譚氏年二十二于歸二十五而夫故氏栢舟自矢上事六旬翁姑下撫七月遺息備極艱辛年六十一而終孀守三十六年雍正十二年旌子綱庠生

俱同上

陳瑞科女義姐年十八許聘張天德張病故義姐欲易服往執婦道其母不從天德葬義姐潛赴墓所哀號永日歸而自

縊合葬於烟樓山乾隆五年旌

大清一統志

肇慶府志卷二十

阮有才妻關氏年二十夫故孀守四十八載乾隆七年旌子

紹文監生

吳志

儒童吳逢沛妻戴氏年十八歸僅三月逢沛應試卒於肇戴

聞訃卽投繯姑救而甦遂矢志孀守事姑盡孝擇立繼子以

爲夫嗣孀守三十四年乾隆十八年旌

同上

生員黃之球妻蘇氏貢生澐女年二十三夫故子廷章朗俱

在襁褓遺腹生子明氏栢舟自矢孝事翁姑勤於課子乾隆

壬戌科明中武進士孀守二十九年而卒

縣志

曾士英聘妻黃氏未婚守貞乾隆三十九年旌

阮戴寬妻梁氏年二十于歸生子茂寬貧而力學抱羸病死

氏年甫二十三遺腹生次子華矢志撫孤家益替翁姑俱久

殯未葬氏自計年少孤立迎孀母同居以鍼黹自給并日省

薪水之貲爲翁姑及先後安厝之費而歲時祭拜必誠必潔
後復移居近其弟之孝廉阮梁者教課其子茂華得成立且
抱孫焉未幾華夭茂亦貧甚氏教孤撫孀媳黽勉持家數十
年如一日嘉慶元年旌

沙錚妻楊氏年二十夫故翁姑憫其年少無子欲令改適氏
斷髮以死自矢恪供婦職比翁姑相繼歿夫之弟妹尙幼氏
盡心撫育爲之婚嫁皆得所旣而撫夫弟次子震川爲嗣教
養成立入邑庠震川故氏悲痛喪明仍率孀媳保抱兩孤孫
卒延夫後守節六十九年嘉慶五年旌

麥世珏妻李氏年二十四夫故守節四十三年嘉慶九年旌
監生王之沈妻沙氏年二十二夫故守節六十年嘉慶十年
旌

翟上揆妻馮氏年二十于歸甫一月夫故守節五十四年嘉慶十六年旌

陳健妻王氏年二十于歸甫七月夫故守節六十三年嘉慶十六年旌

張益明妻曾氏被駱亞尾等強欲逞淫曾力拒致死吳世卓妻朱氏被調姦羞忿自縊俱嘉慶十六年旌

梁秉忠聘妻馮氏年十七聞夫訃奔喪侍孀姑備極孝養擇夫從弟長子上與爲嗣甫三歲殷勤撫育卒得成立嘉慶十八年旌時貞守五十九年

趙銳聘妻許氏明占女年十六聞夫訃奔喪貞守六十三年嘉慶十八年旌

把總方張德女觀姐自痛無兄弟貞守不字侍奉父母終其

身未嘗踰閭閻年六十五卒嘉慶十八旌

杜門雙節一元凝長子桂標妻林氏一次子桂材妻曾氏二子同胎生娶亦同日二氏年皆十九越三年桂標故林氏年二十二又二年桂材故曾氏年二十四俱矢志爲夫立嗣林氏孀守三十九年曾氏孀守四十一年嘉慶十八年旌

方克楞妻陳氏年二十一于歸甫五月夫故氏甘貧孝養撫嗣成人守節四十一年

曾湛賢聘妻陳新姐英卓女年十九聞夫訃奔喪事翁姑孝謹以仲叔子天耀爲嗣守貞四十二年

方世興妻鄧氏年二十二夫故紡績度貧撫孤成立孀守五十七年

阮擇邦妻張氏年二十三夫故孀守六十一年

許成妻林氏

曹日昭聘妻梁氏泰女年十六聞夫訃奔喪貞守六十一年

朱卓南妻曾氏年二十三夫故孀守三十八年

李以義妻朱氏年十八于歸甫四日夫故孀守五十四年

李爾昭妻曾氏年十九夫故孀守四十七年

陳瑜妻姚氏年二十六夫故孀守四十四年

陳玳妻姚氏年二十六夫故孀守五十五年

李裔璣妻鄭氏年二十夫故孀守三十四年

謝廷式妻張氏年二十二夫故孀守四十一年

周成妻林氏年二十一夫故孀守四十年

春江協副將第三子許洪妻張氏雙恩場鹽大使若普女年二十三夫故孀守二十九年以上俱嘉慶十八年旌

駱朝宣妻關氏年二十歸未踰年夫故孀守五十二年嘉慶十九年旌

譚祖堯妻蘇氏煩女年十九于歸甘貧力苦二十三歲生子光緒翁姑繼歿越一年夫以瘵疾亡氏忍死經營喪葬如禮教子成立名在太學孀守四十餘年

羅成林妻陳氏年二十五夫故孀守五十年

庠生莫愈燦妻謝氏比部郎成勲孫女例貢生馨次女年二十于歸夫力學恒出讀于外以故終于寓舍氏年二十九覩櫬入門嚼舌幾絕既念翁老夫尙無嗣恪共婦職以夫兄茂才愈燦之次子坊爲後嗣孀守四十餘年坊例職千總

蔡元芳妻譚氏譜善女年二十二子嘉載甫四歲而夫故氏矢志事姑撫幼姑沒過哀嬰疾四十五歲卒

黃喬光聘妻徐五姐行式女年十六聞夫訃奔喪孝翁姑撫繼嗣貞守六十一年

周啟運聘妻盧氏謹臣女年二十二聞夫訃奔喪貞守四十四年

李宗源妻劉氏年二十一夫故孀守三十年

庠生謝沅妻梁氏年二十七夫故孀守三十四年以上俱嘉慶二十年旌

陳鵬聘妻王冬姐廷琦女鵬卒母不許往乃自經遇救免母佯慰解之而陰爲別字冬姐偵知遂投於江口逆流而上葬於區坑與夫同穴士大夫競爲詩弔之嘉慶二十二年旌貢生莫愈煥妻李氏明經若棠次女年十七于歸翁老姑猶性嚴能得其歡心夫以力學嬰疾侍湯藥惟謹二十九歲夫

卒翁姑先故子城僅九歲家無老成人外侮日逼氏保持幼雛以濟患難卒教其子爲諸生食廩餼以儒世其家孀守三十餘年道光元年請旌

曹鑑妻陳氏年二十四夫故撫子澤通成立爲之授室又早卒兩世孀居形影相弔年五十二終媳蘇氏守姑遺訓稱一門雙節云

譚策妻黃氏年二十夫故孀守五十年繼子士淵聘媳李氏未娶而士淵歿氏過門守節十年而終姑媳雙節邑令王永春作傳以紀其事

譚士清妻黃氏年二十夫故氏事姑撫嗣子俱有禮法守節三十二年

黃復新妻馮氏年十七生子德遇甫周而夫故氏孝事翁姑

撫孤成立迨德遇早卒氏復撫其孫雛辛勤盡瘁守節四十年

林裔高妻關氏年二十四夫故孝事翁姑慈撫遺息守節四十七年

生員陳圖淑妻蘇氏年二十九夫故族有妬其產者謀嫁之氏栢舟自矢備極艱辛事姑盡孝撫子以慈復督其孫如文游於庠邑令胡承謀給以匾曰冰蘖貞操

杜坦妻龍氏年二十五夫故孝養舅姑擇立繼嗣苦守三十七年而終

黃之璵妻馮氏年二十四夫故誓不他適夫兄之玠以其子沈宸承嗣守節數十年

劉祚安妻何氏年二十七夫故家貧氏事姑撫幼曲盡其誠

婦守數十年子執儒監生

姜輝梅妻劉氏年二十八夫故善事繼姑守節數十年子熙賢監生

監生何璵妻費氏庠生道蕃女年二十一夫故子振熊甫三歲事姑撫幼苦節數十年

吳逢澤妻謝氏年二十三夫故守節六十三年

譚士漢妻陳氏年二十一夫故守節四十年

陳宗孔妻楊氏生員蟾客女年二十四夫故養姑立嗣婦守數十年

舉人梁俞姓妻張氏陽春庠生子淑女年二十七夫故孝事老姑撫幼成立婦守數十年

陳思任妻王氏年二十四夫故婦守四十三年

林舜夫妻姜氏年十九夫故守節四十八年

鄧耀榮妻陳氏年二十七夫故守節五十二年

蔡廣義妻李氏年二十三夫故守節五十一年子奇庠生

譚有本妻葉氏年二十五夫故守節三十三年子必進庠生

監生關天錫妻馮氏年二十一夫故守節四十五年

蘇錫球妻林氏年二十四夫故守節三十二年

周繼穆妻葉氏年二十六夫故敬事翁姑慈撫繼子守節三

十七年

許健行妻陳氏年二十一夫故守節四十四年孫明新庠生

林上傑妻覃氏年十九夫故守節六十三年

陳龍德妻仇氏年二十三夫故守節四十五年

生員蘇天材妻鄭氏年二十八夫故守節六十年孫楸益監

生

許日明妻施氏年二十夫故孝事舅姑獨肩喪葬課二子以治生督諸孫於力學守節五十年孫昌宏廩生

陳諛言妻謝氏年二十一夫故守節四十一年

梁嶽妻劉氏年二十一夫故守節三十年

蔡世猷妻黃氏年二十七夫故守節數十年

鄭士榮妻聶氏年二十六夫故守節數十年

監生蘇澎妻林氏年二十三夫故守節數十年孫炆煊俱庠

生

陳朝政妻鄭氏年二十一夫故守節數十年

李翰中聘妻鄭氏大經女夫亡守貞不字以壽終

余元消妻蔡氏年二十二夫故守節數十年

姜熙政妻范氏年二十二夫故擇姪承嗣守節數十年

方潔妻李氏年二十二夫故守節以壽終子桂庠生

生員方叶熊妻吳氏年二十五夫故家貧氏孝事翁姑義方訓子孀守壽終子永斌庠生

梁之燕妻趙氏年二十四夫故守節數十年

姜熙典妻蘇氏年二十五夫故守節數十年

生員鍾崑妻梁氏年二十七夫故守節數十年

馮燦妻陳氏年二十六夫故守節數十年子宗泗庠生

譚士光妻謝氏年二十七夫故守節數十年

胡衛邦妻楊氏年二十四夫故孀守以壽終

龐廷欽妻林氏年二十三夫故孀守以壽終

譚士海妻謝氏年二十三夫故孀守以壽終子朝桂庠生

陳律言妻許氏年二十七夫故孀守以壽終

許文濟妻姚氏年二十八夫故孀守以壽終子杓監生

李光裕妻姜氏年二十四夫故孀守以壽終子耀庠生

生員張之炳妻李氏年二十一夫故孀守以壽終

梁天奇妻溫氏年二十九夫故孀守以壽終

施家瑗妻劉氏年二十二夫故孀守以壽終

梁文煥妻林氏年二十八夫故孀守以壽終

王信妻林氏年二十五夫故孀守以壽終

林氏子聘妻譚氏年十四聞訃歸夫家事姑盡孝守貞三十

八年壽終

按此疑卽上譚氏女但年歲不符存之以俟考

茹彩行妻楊氏年二十夫故孀守以壽終

劉映昂妻程氏年二十四夫故孀守以壽終

譚雄韜妻周氏年二十四夫故孀守以壽終

柯作楫妻楊氏年二十四夫故孀守以壽終

何廷斌妻楊氏年二十七夫故孀守以壽終

程必昭妻莫氏年十九夫故孀守四十五年

劉洞甫妻沙氏年二十五夫故孀守以壽終子建東庠生

馮文猷妻程氏年二十四夫故孀守以壽終

柳瑞璧妻鄧氏年二十二夫故孀守以壽終

林景陽妻譚氏年一十八夫故事姑孝養課子成立孀守二

十八年子潤薰庠生

蘇焯達妻馮氏年二十七夫故孀守以壽終

俱同上

右陽江縣

譚介維妻楊氏順治丁亥城破被執行至城南投井中兵引

繩救之罵不絕口觸石死

吳志

舉人譚相國妻李氏同時亦投水死

大清一統志

生員譚登魁妻李氏順治丁亥城破登魁死難遺孤二李時

年二十六襁負而遁難平返里勤苦婦守教子成立康熙三

十一年旌

同上

陳昌第女年十八未字順治甲午爲西寇所擄罵賊被殺

阮通

志

趙蒞南女細姑許字謝士雄婚有期矣士雄暴卒趙聞痛絕

欲奔喪不許自經死

吳志

楊蒂魁妻嚴氏廩生賓賜女歸楊一載魁亡子名言尙未逾

月嚴年二十一歲矢志撫孤丁亥城破履蹈艱危卒能幸全

日以小學課子後子孫相繼入泮猶不廢紡績壽七十九卒

康熙四十一年旌孫進修己卯亞魁

縣志

楊遵修妻何氏年二十二而夫亡何方懷妊悲號欲自盡翁

姑泣諭之乃止矢志終身以孝聞雍正四年旌

吳志

劉釗妻馮氏二十四歲歸釗未一載夫故力操井臼以供翁

姑甘脆訓子有方卒年九十雍正四年旌

同上

葉九經妻羅氏

楊其能妻嚴氏

舊志卽君寵母

俱雍正四年旌

縣志

羅炯尙妻陳氏早寡孝養翁姑辛勤課子俾獲成名雍正五

年旌

縣志

謝陞良妻嚴氏二十二歲而夫亡翁姑繼逝止遺一孤茹荼

孀守以終

楊超

舊府志作昭

先妻譚氏年二十五夫故訓子守志終身

生員譚繼俸妻區氏二十歸俸越五載而夫逝矢志撫孤夙夜執勤以終其身

譚林光聘妻楊氏年十九夫卒守節擇嗣以承夫後事舅姑以孝聞上俱雍正五年旌

嚴初煜妻區氏生一子夫亡父母憐其貧將改字之區不從乃閉戶自縊舅姑救甦守節終身教子成立俱同上

何乃鑑妻黃氏年二十一夫卒守節撫孤事翁姑以孝稱縣志葉中居妻羅氏夫亡守志孝慈兼備年八十九而卒

曾應科聘妻楊氏生員尙武女未嫁聞夫卒奔喪撫屍含殮不苟於禮翁姑愛之如己子以孝聞立繼承祀教育不倦

楊能泗妻譚氏二十歸楊未幾夫卒家困譚矢志靡他爲夫擇嗣卒完其志

謝進魁妻羅氏夫亡羅甘貧守志撫孤有成俱同上

生員譚聖武妻楊氏夫亡矢節婦道母儀兼至吳志

譚可模聘妻劉氏夫死父母欲爲別字劉投水死縣令陳上

其事大吏旌之曰滄水同清縣志

李景梅妻葉氏舊志祖京母

謝維康妻劉氏舊志錫純母

謝纘及妻白氏

謝勳博妻鄧氏

梁首祚妻利氏以上俱乾隆二年旌

林憲君妻關氏

區瓊客妻劉氏

潘存珍妻羅氏

王思勵妻關氏

區超宗妻譚氏以上乾隆三年旌

劉照妻羅氏

劉孟明妻羅氏

孟明疑卽照字縣志分作二人姑並列之乾隆十二年旌

劉宗燁妻楊氏乾隆十三年旌祀節孝祠

羅元度妻劉氏年二十一夫故守節撫孤廣基數十年如一日乾隆二十二年旌廣基娶妻曾氏生一女爲夫置妾生二子逾年夫故鞠育妾子未幾俱殤曾大慟三日抱夫與翁姑木主投水死聞者哀之

謝世福聘妻溫氏乾隆二十七年旌

楊述聖妻崔氏乾隆二十七年給匾

楊若丕妻夏氏乾隆三十一年旌

劉功煥妻楊氏乾隆三十二年旌

羅振虔妻麥氏乾隆三十七年旌

生員羅維常妻劉氏子婦麥氏三十七年給匾

杜判然妻謝氏

區振乾妻杜氏俱乾隆三十九年旌

王國澤聘妻區氏

未婚守節

楊朝模妻莫氏年十九歸未周而寡事翁盡孝年逾九十

陳振基聘妻李氏鴻裕女年十九聞夫死奔喪撫立繼嗣甘

貧苦節族黨罕見其面

楊賓門聘妻陸氏品汝女年十九聞夫死奔喪事庶祖姑盡

道嗣子屢殤哭訴亡夫之靈卒爲延祀

區蕃衍妻譚氏年十九歸二載夫卒無子孀居茹素終身不

與宴會上俱嘉慶四年旌

杜遐妻梁氏年十九歸夫亡孝事翁姑教育嗣子孀守數十載嘉慶十四年旌

區聘之妻黎氏年二十一于歸夫亡無子翁姑憐其苦氏急為立嗣以慰其心嘉慶二十一年旌俱同上

右高明縣

鄭保之

阮通志作亞保

妻唐氏

國初賊刦其鄉殺保父子唐得脫

奔母家及賊退歸鄉殯葬其夫與翁致祭於墓祭畢慟哭赴

水而死

大清一統志

馮意恍妻崔

阮通志作霍

氏驛丞崔大讓之女時盜賊縱橫恍送

崔避難父母家後恍為賊所殺崔方年幼父勸之改適崔不

從父堅欲強之崔曰待吾歸祭遂回蓮塘哭數日而死吳志

鄭士道妻吳氏時範女其鄉為賊所破氏義不受辱持刀砍賊賊叢矛刺之大罵至死人謂此女不愧時範之家訓云通志

生員梁滙妻吳氏歸梁數載產一女年三歲梁入泮後病劇顧吳曰吾必不起汝年少無為我守氏大戚請先死家人亟救乃免及夫亡母往弔氏向母前叩首曰女今謝母恩他日恐不相見矣母勸慰而去及夫三虞之辰母遣僕婢來奠氏放聲慟哭遂縊死吳志

蔡昌麗妻薛氏生一子四歲而昌麗卒薛矢志栢舟事姑盡孝教子持家靡不曲當年八十有二乾隆二年旌同上

庠生鄭廷進聘妻吳氏年十八奔喪守節時廷進之祖母梁繼母胡俱孀守吳侍奉惟謹及歿喪葬盡禮初廷進蓄婢私

之生子克明吳視如已出娶婦梁舉三孫而克明死姑婦相
守訓孫成立長孫儀尋天遺孤僅三齡孫婦馮亦矢志不二

一門三節吳氏乾隆二十六年旌

縣志

鄭亞強聘妻梁蝦姑子江女未婚而夫故氏欲奔喪母弗許
慟哭不食數日母勸解百端乃食強爲笑語將及一月防守

稍懈遂閉戶投繯死

吳志

夏亞朱妻陳氏被陳德奇調戲自縊死俱乾隆三十六年旌

大清一統志

李立華妻梁氏立華於田操作溪水驟漲被溺死梁聞奔赴
夫溺處痛哭自沉邑令何善達捐金殯埋之

縣志

黃緒昌妻蘇氏二十歲于歸半載夫亡守節四十二年立姪

兆富爲嗣

吳榮褒妻馮氏年二十五夫亡遺一女氏矢貞事姑立姪大清爲夫後撫育成立就職縣丞守節四十八年俱乾隆四十七年旌

吳允登妻馮氏年二十八而孀子文翰娶岑氏生孫宗福而文翰又亡姑媳孀守鄉黨無間言宗福長聘張氏未婚而天張年十六誓不更適爲夫立繼人稱一門三節張氏乾隆五十一年旌

吳宗福聘妻張氏年十九聞夫亡痛泣奔喪撫三歲兒炳萬爲夫後鞠育如已出矢貞三十八年已題旌建坊

監生吳景仁妻馮氏守節四十八年

武生馮堅仁妻吳氏監生源盛女年十八歸馮越四年夫卒撫姪元祥爲夫後不數年祥又亡復撫姪孫良爲祥後守

節四十七年

武生劉清寶妻梁氏生員梁澤永女年二十八而夫卒氏孝事翁姑撫幼子持家勤儉養教四子俱成立婚娶卒年五十八歲

吳日潤妻鄭氏遂溪訓導鄭坦四女年二十歸吳五載生一子甫三月而夫亡氏孝事翁姑撫育幼子孀守四十餘年吳位勲妻梁氏榮寵女年十七歸吳生二女二十二歲夫故撫堂姪祿名爲夫後家貧竭力以供祭掃守節四十餘年馮光耀妻吳氏縣丞朝正女年十九歸馮生一子二十六歲而夫故氏孝養舅姑訓子身列膠庠守節四十餘年吳欣才妻馮氏監生元煥女二十歲于歸越三年夫卒立姪發存爲夫後守節四十餘年

馮文韜妻鄧氏晉岳女年二十七歲夫故一子炳光氏撫育成立身入膠庠守節五十年

吳元俱妻梁氏年二十歸吳生子阿麒未幾夫死氏年二十四服事翁姑保育幼子冀其成立阿麒十八歲天姑亦繼歿氏慟不欲生又恐傷老翁心乃強起居孝養彌篤翁遺命撫夫兄元卓之子爲次子而取夫兄元俊之孫入繼阿麒孀守三十餘年

陳維才妻鄒烈婦因被夫兄調戲不從羞忿服毒死嘉慶八年旌

鄭晉賢妻陳氏夫亡家貧無子還母家敝衣垢容矢志不二年六十五而卒

監生鄭東英妻吳氏父爲守戎年十九于歸二十生子慕韓

甫週歲夫卒氏矢志苦守孝事翁姑延師課子名列諸生娶媳李氏生孫甫四齡慕韓又卒姑媳孀守撫幼孫以待其成初東英有弟夫妻相繼死遺孤僅一歲氏撫育如己子長而授室戚黨咸稱之壽至七十而終姑婦雙節

鄭棟臣妻梁氏開平梁敬溥女適鄭生一女夫死氏年二十六矢志苦守克盡婦道翁姑憐其志爲立後守節五十六年卒年八十有三

庠生鄭仁先妻馮氏啟鰥女年十七于歸越五載夫卒諸姑憐其少且無出微言勸他適氏正色拒之終身不與談年六十二而卒守節四十一年

馮旣恩妻鄭氏啟遐女年十八歸馮生一子一女皆不育二十四而夫故翁姑慮其年少或不能終守靳財產弗與氏茹

茶自勵孝事彌謹乃以族姪榮創爲之嗣守節四十七年年七十

馮名傑妻吳氏紅女年十九歸馮生二女夫亡氏年二十五翁姑相繼歿夫弟亞牛甫十三歲氏爲撫育授室雖老操作弗輟

梁邦盛妻吳氏年十八歸梁越二年生一子甫三月夫死家極貧母欲奪其志不可嘗拾薪炊米晝夜緝績卒撫其子以承夫祀守節三十九年愈苦愈堅

馮光揚妻梁氏年二十歸馮次年馮死方娠慟哭失聲越月生子家故貧翁姑復老且病氏黽勉緝績以供朝夕及翁姑卒經營喪葬備極艱苦有鄰媼者微勸他適厲色斥之守節二十九年雖至親黨未嘗見其齒笑也

歲貢生甄金銓聘妻吳律姑樹派女性至孝父母死誓不嫁以撫其弟弟病卒遂慟哭赴水死

吳建禮妻馮氏年二十六而寡孝事翁姑撫育幼子壽六十五而終守節四十年

生員馮奇能妻謝氏德亨女生一子年二十五而寡守節三十二年

何德林妻馮氏爾雅季女年十九適何甫三月夫死家極貧辛勤紡績以事翁立族子爲夫後守節三十年

莫美業妻伍氏志藩女年二十適莫二年生一子甫四齡夫死氏孝養翁姑撫育孤稚守節五十六年

梁彩龍妻周氏開平人年十八適梁三年生子翰任甫一週夫死家貧緝績以育其子稍長課誦不少貸聘媳崔氏未婚

而翰天亡氏孀居六十年茹荼飲血如一日至老未嘗復御酒肉

梁作柄妻陳氏年二十五而寡子一鳴僅週歲而翁姑皆年近八旬氏仰事俯育孝慈兼至守節四十二年

梁世求妻陳氏年十九歸梁越五載夫死一子甫二月氏苦志孀守子六齡又殤翁姑老且多病奉湯藥惟謹孝事二十餘年翁姑相繼歿喪葬盡禮又數年而氏卒以夫兄之子邦宗承嗣

監生梁紹基妻馮氏于歸未週而夫故馮哀痛吐血自縊遇救甦侍奉老姑以孝稱姑歿婦泣曰今而後吾得從夫於地下矣遂不食死知縣馬元英上其事

梁亞務聘妻歐氏振文女年十八夫故請往父不許遂自經

生員吳世隆之子立偉聘妻劉氏遠登女夫故欲奔喪父母

弗許遂乘閒自縊死

通志作世隆妻誤

鄭亞保聘妻梁氏奕聘女年十七夫故梁聞痛哭失聲遂自縊死知縣繆錦匾其居曰閨幃正氣

鄭晉爲妻吳氏年二十三夫故朝暮哭却飲食姑令幼叔勸之勉進食是晚沐浴更衣自縊死

鄭忠培妻岑氏武生昌岐女二十歸鄭兩載夫死葬畢遂自縊

黃貴三妻鄭氏尙文女自幼歸黃得翁姑歡年二十夫病服役不輟纏綿三載夫亡哀慟不已越三日赴水死

俱同上

右恩平縣

監生蔡璿妻吳氏四會貢生吳廷璽女年十七歸璿二十八

而璿殞生二女無子立房姪與彭爲後守節四十年乾隆六

年旌

吳志

王氏女父金任廣寧所千總遂家焉女年十九適福建晉江陳華宗明年華宗故矢志靡他嘗割股療親孝節兼著乾隆八年旌

生員李肇福妻馮氏諸生光俱女年十七于歸七年而肇福殞馮矢志苦守孝養翁姑訓迪孤子乾隆八年旌

生員林泮妻周氏諸生杆齡女年二十二歸泮二十七而泮殞舅姑在堂遺幼子三人周勵志冰霜仰事俯育鄰里無間

言乾隆九年旌

俱同上

趙奉長妻錢烈婦因強暴調姦不污羞忿服毒死乾隆十四

年旌

縣志

生員陳兆勲妻周氏諸生裕瑛女年十八于歸二十四歲夫故氏水雪爲心松柏勵節跡不逾戶庭聲不聞閭外生子二人長一椿次述蕃勤劬訓迪並爲邑諸生孀居四十餘年陳傑聘妻王氏監生王如昌三女未嫁而傑天王時年十九聞訃易服矢志不貳父母屢勸更字卒不能奪縣令給匾旌之

林楠妻陳氏年二十三夫死家極貧氏勵冰霜勤紡績仰事舅姑黽勉殯葬守節四十餘年

李枝茂妻林氏年十六于歸二十一歲夫卒無嗣氏哀痛幾殞勵志苦節閉戶女紅罕及閭外行年五十始取同宗髫兒入繼守節四十餘年

庠生陳方穀妻馮氏年二十七夫死堂存垂白之姑膝止冲

幼之子殷勤事育仰慰俯誨風淒雨泣備極酸辛守節三十餘年

沈彥妻覃氏略諳書冊曉文理年二十五育二子夫卒哭哭撫字稍長命就外傅每還家卽勤訓迪後二嗣成立仲已列邑庠生抱孫矣復作訓孫長歌一篇孀守四十餘年事詳縣志俱同上

監生陳顯蕃妻王氏二十五歲孀守八十五歲病故守節六十年孫舉人陳紹熊在禮部呈請題旌採訪冊

生員歐陽敏時妻陳氏守節三十一年孝義兼全道光二年詳報請旌

生員陳豪妻彭氏二十一歲孀守五十九歲病故守節三十八年於道光四年內詳請旌表

儒童梁榮基妻盧氏二十四歲孀守計至道光三年五十八歲已守節三十四年卽於是年詳請旌表

貢生楊茂通妻程氏二十四歲孀守計至道光五年已五十四歲守節三十一年卽於是年詳請旌表

俱同上

右廣寧縣

趙必枯妻吳氏年二十三而夫喪甘貧孤守惟一子良護教育成立年六十一里老賢其孀守聞之於縣知縣葉憲祖匾其門曰喬門節孝壽八十有九至順治八年而終

吳志

何門五貞烈庠生何表琇女曰三娘子婦曰鄧氏琇弟生員表琇女曰質娘子婦曰林氏婢鄒氏同居一室順治癸巳夏土賊剽掠琇父子逃竄五人懼賊辱相繼投井死事聞邑

令高夔龍表其墓曰五烈

郝通志

生員甄任蓮妻吳氏順治丙申社賊擾境吳聞夫被害卽拋
幼女自刎姑曾氏及姪女甄二妹同縊死其姒曹氏亦以罵
賊死於亂刀下一門四烈人咸哀之

大清一統志

吳亞姬生員御隆長女舉人振秀孫女年二十一未字康熙
庚戌五月十九日社賊大劫度不免自刎死隆與叔廩生振

英合家被殺

吳捷藩

御隆子

妻伍氏一子在襁褓付其婢賊欲殺之婢以

爲已子得免伍氏尋亦死之

張嘉立妻吳氏年二十五夫爲賊殺見吳美欲污之氏大哭
罵不絕口賊怒以石磨壓死

張伯璿妻陳氏西逆督餉剽掠碧潭村執陳欲犯之大罵不
辱而死其女弟金娘亦罵賊被殺

梁煥泗妻謝氏生員紹林女夫死遺腹生男紡績養姑鄉遭
兵燹挈姑與子逃難後復歲飢盜賊恣刼每相戒曰節婦之
食不可奪也守節四十餘年而卒

俱同上

余鍾鳴妻伍氏仲濟女年十九于歸甫四年而鍾鳴沒遺孤
三歲氏撫之成立家雖貧以勤儉常有餘積年三十九卒是
歲賊圍城糧絕其家二十餘口賴氏積穀以生

吳志

司徒氏女名阿引許配余氏子未歸而夫卒女聞往哭遂畢

命於纆

郝通志

譚秀綱妻勞氏綱被盜殺氏哭控大吏乞師報仇許之發兵

剿捕長沙一帶居民賴以安輯人謂爲女中申胥守節四十

餘年而卒

吳志

陳其仁妻譚氏迴舒女年二十二于歸兩載夫亡無嗣泣守

夫靈六旬拜辭父母舅姑閉門自縊

陶參妻鄺氏躍文女年十八歸參未及兩載參死遺子之藩
僅六月氏矢志不二撫孤事姑曲全婦道之藩娶婦林氏生
孫宗明三齡之藩又天與姑兩世孀守共撫遺孤宗祧得以
復延

周强鼎聘妻蘇氏占九女未歸而夫死氏年十八聞訃奔喪
誓不他適擇嗣世輝育成婚配奉姑馮氏存沒盡禮守節二
十八年而終雍正四年旌

勞大進妻黃氏年二十五大進沒嫂以其無子陰爲受彭氏
聘黃覺之哭曰辱身再醮有死不從所不卽自裁者欲俟叔
生子以定繼夫後耳彭覲黃厚奩訟之官知縣王命璿數彭
之罪而杖之人人稱快

俱同上

李自煥聘妻梁氏貢生慶麟女未嫁而夫亡聞訃奔喪誓不
他適爲夫立後守節四十餘年勤紡績以奉舅姑雍正四年
旌

郝通志

楊景運妻陳氏二十三歲夫故乃擇夫兄子振榮承繼一生
不理容貌待翁姑始終敬孝雍正五年旌

吳志

方克懷妻何氏生三子年二十三夫亡家貧矢志孀守撫育
三子教以義方守節四十餘年乾隆九年旌

戚士賢妻陳氏年二十六夫故泣血自矢奉翁姑克盡婦職
葬祭無不盡禮守節五十餘年乾隆九年旌

貢生張文達妻伍氏年二十九夫故氏侍耄姑撫稚子孝慈
克盡孀居四十五載

生員羅紫妻陳氏生一子年二十六夫故氏敬事翁姑撫育

稚子守節三十載

張士旭妻譚氏年二十三夫故子甫三歲撫育成立舅姑歿葬祭如禮守節五十七年上俱乾隆十年旌

楊奕嘉妻吳氏年二十七夫故勤儉孀守鄉遭水災廬舍多毀吳出粟米賑濟乾隆十一年旌

戚士貽妻梁氏歸三載夫亡守節翁姑多病侍奉湯藥不辭勞瘁及翁姑歿殯葬盡禮孀守四十七年

庠生馮際可妻李氏歸九載矢志栢舟孝敬翁姑養葬盡禮孀居三十餘年

楊植魁妻梁氏歸七載夫故止生一女家貧歲飢紡績供養事姑盡孝孀居三十餘年

陳美德妻張氏歸七載生一子氏年二十五夫故家貧紡績

自給教子以義方孀守三十餘年上俱乾隆十一年旌

梁樂昭妻馮氏年二十七夫故孀守三十四年

生員張煥文妻何氏進士成波次女年二十于歸生一子八

載夫故養姑撫稚貞守三十五年俱同上

吳德亮妻周氏年二十九夫故生一子氏少通內則事高堂

菽水承歡訓幼子義方是式孀守三十餘年縣志

生員張公祐妻陳氏年二十九夫故養老撫幼孀守四十餘

年上俱乾隆十二年旌

李明周妻謝氏年二十七夫故敬事翁姑辛勤訓子守節二

十六年

譚運同冊作運金妻甄氏年二十于歸生一子二十六夫故善事

翁姑撫育孤稚翁姑亡葬祭盡禮孀守四十七年

肇慶府志卷二十 人物 列女三

三

張雲好妻吳氏生一子年二十八夫故氏孝以事翁義以訓子仁慈和睦鄉里咸稱守節四十餘年

譚大鵬妻張氏年二十二夫故慟欲身殉因翁姑待養抑情奉侍營給喪葬擇立繼嗣孀守三十餘年

李朝學妻張氏生一子年二十六夫故孝事耄姑義訓幼子孀守三十三年上俱乾隆三十三年旌

張榮椅妻謝氏夫死孀守三十餘年堅貞慈孝人無間言

何顯熾妻李氏生二子年二十七夫故氏孝以事姑義以訓子和睦妯娌矜濟飢寒孀守四十一年

何顯汝妻羅氏年二十九夫故氏矢志守貞終始如一孀居四十八年

生員李信圭妻張氏貢生儒學張式玉女年二十九夫故僅

遺一女矢志守節立夫兄之子爲繼娶媳一月而子亡復擇夫兄之孫以繼子孀守三十五年以上俱乾隆十四年旌

許公歡聘妻羅氏生員羅以球女年十八未婚而歿卒氏奔喪守節爲夫立繼

關汝蒼妻梁氏

楊凝儀妻張氏

張學忠妻司徒氏

伍文藹妻張氏

譚重均妻李氏

伍文元妻譚氏

張昭蓆妻吳氏上俱守節數十年

許馬樂聘妻吳氏克宏女年十七未婚而歿卒氏奔喪守節

爲夫立繼

張貞籲妻許氏

司徒熙碩妻余氏

許禮文妻甄氏

張洪裔妻余氏

何清甸妻梁氏

何清源妻周氏以上六人乾隆七年給匾

烈婦陳以安妻趙氏邑進士梁臨爲詩以紀其事

梁臨詩君厄兇狠度不逃妾身妾命比鴻毛血凝白刃千年
豔名壓青山萬古高故國杜鵑愁草樹滄江精衛怨波濤他
年太史求遺跡未必無人爲顯褒

烈婦雷阿長妻張氏乾隆二十六年旌

烈婦戚欽源妻梁氏乾隆二十七年旌

烈婦司徒泰信妻關氏乾隆三十一年旌

烈婦簡隆殿妻余氏乾隆三十六年旌

許雲龍聘妻吳氏乾隆四十六年旌

貢生張嗣翔妻鄺氏乾隆四十六年旌

司徒見好聘妻關氏乾隆四十八年旌

生員何壯為妻關氏乾隆五十六年旌

處士梁巨源妻余氏女亞蘭嘉慶己巳夏海寇攻長沙擄掠

甚眾余與女亞蘭懼為所辱同投池死大府請旌建坊曰母

貞女烈邑令龔鯤為歌以紀其事

俱同上

龔鯤歌湘江妃曹江女清節洽洽照江水妻貞女烈萃一門書契以來今見此梁孟相依二十霜階前兒女榮成行餉耕冀缺終相敬侍姆恭姬不下堂一朝海濞氛起飄突風波毒閭里帆集長沙作戰場白骨撐天血流市連雲萬厦頓灰飛玉怨珠愁席捲歸破鏡何緣返徐氏黃金好待贖文姬燕天賦勢猛豺虎半畝方塘死其所母女同瘞絕命詞泰山死

人物

列女三

三

重非鴻羽殺身不辱古所難清波一擲兩心安對敵捐生致
士氣見義有勇輕儒酸此心皎如水與月皓魄高懸流不息
清流皓魄鑒此心名與水月終無極舊地重經喚奈何起看
雙塚鬱嵯峨千年華表棲黃鶴兩世朱顏委綠波王言綸
符銘文石欲把貞珉表幽魄葬山原草木香魂歸夜月波
倚白君不見傍母鳬難沙上眠護孫慈竹半春夭為君更續
梁鴻操行路啼噓淚雨連

梁聯錦妻張氏長沙人聯錦行賈於外海寇掠長沙張氏被
擄約以七月十五日許贖及期賊船泊他所聯錦覓之不得

氏赴水死採訪冊

吳毓昌妻司徒氏嘉慶十六年旌縣志

生員梁龍發妻余氏嘉慶二十五年旌

伍維念妻譚氏

勞允溥妻司徒氏俱道光元年旌俱同上

右開平縣

李氏女未笄時年十六已受聘流賊刼之使乘以馬自知不

免馬上奮躍奪刀罵賊自刎而死

大清一統志

譚氏定國女年十九爲流賊陸社隆所掠欲汚之女曰我良家女爾狼賊何敢然賊怒割其腹於松樹下至今鄉人稱其

樹曰貞女松

同上

八貞烈俱鶴山人順治甲午李定國殘掠古勞鄉有古嘉賢

妻勞氏與其姒任氏赴池水死胡氏楊春魁妻赴井死其男

與幼女殉焉勞貞娘少孤性狷潔聞李定國之虐嘗語其姑

姊妹以死自誓寇至赴水死李氏古周平妻聞變更服拜辭

其夫赴井死其女靈娘從之

吳志

勞勝娘君衍女性潔每獨居不與羣女伍順治甲午十月滇

寇猝至女語人曰吾必死遲將不及疾起圖死所而寇適至

並驅之行女伺間投塘里人爲賦貞娘之歌

李惠先妻梁氏年十九而孀家甚貧紡績餬口教遺腹子未冠有文名歲癸卯遭賊掠梁堅不肯行賊笞其背血流遍體梁嘆曰吾留此殘喘者以幼子未成立耳今子稍長肯覲顏

驍節耶躍潭而沒越三日浮出面如生

黎鳳祥未婚妻宋氏鳳祥祖母有惡疾宋父悔婚還其聘且爲別字女知之悲咽不食及并鳳祥仍備禮以請其父力却

不納女曰父母業以兒許黎矣今日之事誠愛兒也然以愛

故使父母有不令之名兒失從一之義生亦何爲自縊死

俱上

生員吳勲妻楊氏年二十一生子甫二旬勲沒楊日夜哀號

淚竭血出竟喪明死

縣志

勞德凝聘妻關氏年十四聞夫訃奔喪守節孝事舅姑未幾姑卒事繼姑益敬謹以夫弟德兼子爲嗣未期月而殤氏哀痛絕望勺漿不入口七日而卒

梁巽娘許字呂毓芳婚有期而毓芳病危梁父憂之巽娘泣曰兒頗知書彼共姜何人哉父頷之及歸信宿而毓芳死巽娘血淚交迸數絕而復甦終喪未嘗見齒孝舅姑睦妯娌人無間言

縣志

麥翰卿妻楊氏歸翰數載流賊劫之行楊卧地罵不絕口賊刃之未死扶回醫愈時懷孕三月後誕子越二年而美死撫孤孀守壽滿百齡邑令詳報旌表奉准建坊終百有六歲

志

羅登振妻曹氏年二十四夫故撫幼孤守節康熙三十年賊李長鬚等屠村肆暴曹毀容罵賊刃傷右股克全貞潔孀守

五十餘年鄉人公舉請旌

庠生許越翹妻宋氏無子氏年二十五越翹病且死氏嚙指
誓曰妾未能卽從地下以嗣子未定與君喪葬諸大事耳黃
泉相見請俟三年所不如約者有如此指及釋服定繼嗣氏
拜木主入室自縊家人救之後不食卒

俱同上

溫傑生妻源氏鶴山霄鄉人傑生兄弟三人俱早卒姊姒皆
改適矣氏獨事翁撫幼子不去翁曰無以爲活奈何氏曰搓
棉花亦可活也氏生順治癸巳終乾隆壬申壽百歲沒時曾

孫四歲矣

宋訪冊

李英舒妻劉氏康熙己酉山賊劉保行掠去以姓同呼爲姑
遺之金帛大罵擲於地賊怒刃之罵不絕被害

大清一統志

貢生呂應龍繼妻黃氏年二十七守節不渝壽九十二康熙

間學使陳均錫以栢操松齡匾

吳志

李自煥聘妻梁氏年二十夫死奔喪守節雍正四年旌九年

邑令張浹表其廬曰純貞卒年七十二祀開平節孝祠

縣志

趙成潤妻李氏夫早卒母欲奪其志遂自縊雍正十三年旌

何登先聘妻方氏乾隆四年旌

同上

生員黎烈璫妻張氏于歸三載夫死守節四十三年乾隆十

一年建坊入祀

吳志

陳國芝妻馮氏夫死守節四十八年乾隆十七年奉行給匾

清標彤管四字鐫刻姓氏於碑

同上

庠生呂三復妻黃氏年二十二守節知縣王命璿錫以貞節

流芳匾額詳請題旌壽八十五

縣志

陳應蘭妻李氏孀守無玷知縣王命璿匾其門曰儒門節孝

羅聖用聘妻麥氏年十九聞夫訃奔喪守節乾隆五十三年旌

易體仁妻呂氏體仁卒呂送葬返而自經家人救之祖姑泣諭之且就呂寢以防守呂闕祖姑既寢遂自縊死

源貯晃妻溫氏初貯晃病俗有衝喜之說迎婦歸實未成夫婦禮也甫五日晃病革謂婦曰我死汝早適人毋自苦婦曰妾歸時已甘作源氏鬼矣貯晃曰若是吾目且不瞑婦退取薙髮刀自刎死貯晃聞之亦一慟而絕俱同上

吳溢遠妻郭氏鶴山黃寶坑村人乾隆壬子六月水口渡舟沉沒溺者百人溢遠與焉氏時二十九歲日負汲種桑灌園育一子二女皆成立現年六十歲采訪冊

方貫文妻吳氏鶴山坡山人吳槐炳妹也歸二年而寡宗老欲爲擇繼氏曰年少則性格未定姑俟之後氏欲立姪輝隆宗老曰某序當繼氏曰立繼當惟我所欲若必以序論又何所謂擇哉宗老不能難輝隆善事繼母鄉人乃慶氏得子現年七十歲

同上

王韓泰妻譚氏夫卒矢志守節夫兄逼令改適譚勢不能自全遂毒而死嘉慶九年旌

縣志

庠生劉進妻李氏年二十八守節子一麟進士

同上

李教育聘妻施氏年十九教育死氏奔喪守節數月姑亦殂氏事翁翁備盡孝養年六十二終

吳志

李英護聘妻馮氏聞夫訃奔喪守制事舅姑有道終身不出

戶庭年五十二終

同上

易士芳聘妻何氏燦儀女聞夫病欲歸侍藥父不許越數日
芳病垂危泣求父母往視芳卒氏擗踊哭泣成服盡禮夫有
幼弟甫七歲氏體姑志爲之撫養未幾姑亡夫弟亦相繼淪
喪焚子獨守歷三十年艱苦備嘗縣志

楊珙璋妻陶氏守節三十餘年

馮仇妻梁氏年二十七守節

馮士正妻李氏年二十一守節

馮彥式妻林氏年二十守節

李瑞安妻施氏年二十守節

生員呂隆妻彭氏年二十六守節

呂宗潤妻楊氏年二十四守節

張渭賓妻何氏年二十一守節

李流光妻易氏守節六十餘年

丁廷友妻賴氏年二十七守節

楊羣琳妻郭氏年二十五守節

李伯上妻馮氏年十九守節

賴良茹妻廖氏年十九守節

勞允枝妻馮氏年二十四守節

呂飛卿妻馮氏年二十四守節

呂邦壽妻秦氏年二十一守節

古朝受妻勞氏年十八守節

劉貴芳妻黃氏年二十二守節

馮乾卿妻李氏年二十一守節

勞翥雲妻黃氏守節六十六年

郭慈叔妻勞氏守節數十年

劉植佳妻何氏劉植端妻李氏一門雙節

馮章揆妻鄧氏守節數十年

馮英光妻李氏守節數十年

陸君達妻黎氏年二十四守節

李瑞鳳妻任氏守節數十年

羅阿元妻麥氏守節數十年

馮漢集妻李氏守節數十年

何學海妻李氏守節三十餘年

宋明傳妻胡氏年二十二生一子夫故孝事翁姑孀守四十

七年嘉慶十一年旌

李新元妻何氏于歸一載夫故孀守三十六年道光四年旌

吳有真妻屈氏年六十六歲孀守四十一年

王世蕃妻呂氏年五十一歲孀守三十七年

林望軒妻郭氏于歸五載孀守三十七年

俱縣志

王瑤泰妻呂氏二十六歲夫故孀守四十餘年

王朝仕妻李氏二十三歲夫故孀守三十餘年

李俊賢妻呂氏二十二歲夫故孀守四十餘年

李令儀聘妻任氏年十八未及于歸聞訃奔喪年四十一歲

道光四年旌

易王氏年十八未及于歸聞夫故奔喪年五十二歲嗣子隆

芳爲繼承祀道光四年旌

李亞已妻溫氏年二十二歲未及于歸聞訃奔喪孀守三十

餘年道光四年旌

俱同上

右鶴山縣

明經吳孟麟妻譚氏鶴山處士貫日女性聰哲夫婦相敬如賓事翁姑猶勤慎順治癸巳所居里井中墮餅忽浮衆往觀之以爲祥譚獨曰餅陶器土也久沉而浮土動也此方其有變乎明年甲午滇寇圍城孟麟曰賊破城不能相顧各宜自保以圖後聚氏泣曰君幸自重妾有死而已樂昌破鏡事未敢學也未幾兵食盡掠人爲糧突有兵入其室譚避床下孟麟被執臨以白刃氏走出大呼曰彼瘠我肥不如食我兵舍麟執氏麟不忍相持爭死氏怒目揮之曰此何時不速去麟乃走回顧氏已白刃加胸矣時十月一日也

按阮通志譚氏已載入開平吳府志編列鶴山均誤庠生李昌運妻何氏夫死引繩自縊欲以身殉屢爲母所阻

時方離亂潛逃鄉落有强暴乘亂欲威劫之何執刀厲聲曰此刀可蹈此身不可汚若輩乘危傾人天當不若寬也遂自刎死雍正七年旌

大清一統志

溫月嬌和服女避地三洲爲羣盜所掠義不受辱與其嫂某

府志

氏相攜觸石而死雍正七年旌

許府志

沐妻歐氏年十七歸沐染異疾歐竭力事之服

飾簪珥盡資藥物夫死遂自經顏色如生知州李育熊匾其

門曰大家懿範

俱同上

貢生孔宗堯女三娘少許吳知縣語論次子隨宦四川遇難不返女誓志守貞親串莫由識面會馬某遣卒執堯女不及避乃自悔曰吾顏面何當爲鼠輩見資人談議即速將此清白身見吾夫子於泉下遂絕粒數日而死

吳志

李爲楫妻何氏年十七歸李未三載而夫死遺腹一子培盛

何上事老姑下撫幼稚孀居貞潔人無間言雍正七年旌

同上

生員李名揚妻劉氏年二十一失所天擇子以爲夫後事姑

誠孝雍正七年旌

郡志

廩生徐濬妻梁氏國學許觀三女年二十七失所天孝事尊

嫜義方教子乾隆五年建坊入祠以長子中璘次子中運官

封宜人加贈恭人

吳志

李應桂妻郭氏庠生郭季聰女年二十七歸李五載桂亡氏

守貞教子名列成均乾隆七年旌

生員謝璣妻何氏年十八歸謝二十四歲璣亡氏堅貞不渝

孝敬尊嫜殷勤繼嗣乾隆七年建坊入祠

李聖詔妻謝氏生員謝國祥女年二十一歸李甫期年詔故

遺腹生子鳳集教育兼盡任廣西太平府經歷氏孀守三十餘年乾隆八年建坊入祀

王翼妻周氏西寧邑庠周斌之女二十于歸四載夫亡守志養葬翁姑撫成弱息乾隆八年旌表入祀

徐中矩妻李氏生員李應梅次女年二十二矩亡無子孝於舅姑和於妯娌矢志孀守三十一年內外無間言乾隆八年旌表入祀

李庭詡妻王氏生員王樞教長女二十歲于歸三載夫故撫育遺孤榮明入太學事翁姑以孝乾隆八年建坊入祀

何寅妻李氏十八歲于歸二十四夫卒撫孤禦侮備歷艱辛乾隆九年建坊入祀

謝偉績妻梁氏我恕女十八歲于歸甫二十四日夫亡誓矢

栢丹孝舅姑立繼嗣乾隆九年旌表入祀

李爲綜聘妻梁氏文學殿蘭女年十四歸李十六歲綜夭矢志完貞力營喪葬教訓繼嗣乾隆九年旌表入祀

李曜妻劉氏士進長女年二十歸李六載曜故氏矢志養姑擇繼乾隆九年旌表入祀

生員李楨妻梁氏生員梁準女年十九歸李九載楨故遺一子士暄未娶而卒氏孝事翁姑苦守數十年乾隆十年建坊人祀

李士暄聘妻莫氏生員悅謙季女年十九聞夫訃奔喪守義孝養孀姑梁氏擇立繼子李璋宗嗣賴以不絕乾隆十七年建坊知州楊瓚有莫貞女傳見州志

營兵譚傑妻何氏廷佐長女年二十三于歸八年夫故苦守

二十四年乾隆二十三年入祀

俱同上

梁焯妻張氏

梁宗熙妻李氏俱乾隆二十七年給匾

州志

梁喬棟妻麥氏歸五年而夫亡氏事姑撫幼備極艱辛乾隆三十三年旌表入祀

謝世昂妻溫氏年二十于歸二載昂故寡居事姑承順擇姪周鳳爲子訓督成名守節五十年壽八十九而終乾隆三十五年建坊入祀

溫烈妻戴氏夫亡冰心自矢內外無間乾隆三十六年旌表入祀

生員溫奕梓妻孔氏夫亡事姑孝順擇子入嗣貞白無瑕乾隆三十六年旌表入祀

李靜聘妻黃氏生員玠次女年十七聞夫病篤女不食者五日及夫歿奔喪成服喪祭備極哀誠孝養翁姑繼姪秀松爲嗣守節數十年乾隆三十八年旌

馮勝魁妻聶氏乾隆四十五年旌

監生莫秀成妻黎氏年十五于歸十載夫亡孀居事姑家貧紡績教子成名乾隆五十三年旌表入祀

吳化江妻溫氏夫亡冰心葉節矢死不移擇嗣立後乾隆五十四年旌表入祀

溫奕緝妻梁氏夫亡年二十守節擇繼子以承夫祀乾隆五十六年建坊入祠

吳孝婦者附監生李世勳妻金華守東安吳瓊芳女乾隆丙辰世勳赴郡應試姑驟患痰病勢將不起吳籲天請代剖股

和藥以進姑病遂瘳州牧宋給綽楔匾曰孝德可風子開雲

側貢生

俱同上

生員徐濱妻梁氏濱病危梁泣禱於天割臂肉和藥以進病遂愈復患夫無嗣日夜暗泣臂傷忽潰爛見骨猶忍痛不敢言夜夢神告以山漆可治且畀明珠一顆曰此郎官星也應

在爾妾明年妾果產子中聘後官台州府經歷

州草志

何炳章妻李氏適何三載而寡家貧無子依母家紡績自給嘉慶丁丑西潦暴漲隨母避於高阜數日不得食母涉水求得一粥勸之食李泣曰母子均餓母不忍食而與女女反忍食而令母餓耶越日潦益漲無所得食遂餓死

採訪冊

馮士佳妻莫氏歸五載而夫亡事姑撫育教子成名嘉慶九

年旌表入祀

溫廷熊妻劉氏夫亡誓死靡他女紅度日嘉慶十六年旌

庠生李潛妻梁氏監生傑文女年十九于歸兩載夫亡氏矢

志守節孝順翁姑擇繼子撫育成成人未幾翁姑卒子亦亡惟

氏一人針線度活冰霜五十二年而卒

李華文妻梁氏年二十歸李越五載而孀無嗣止一幼女值

大水抱夫棺以殉遇救得免苦節二十五年嘉慶二十四年

州人呈請旌表

生員劉顯泉妻梁氏年十七于歸二十七夫亡痛哭欲絕四

子一女俱幼氏敬事翁姑操作撫養成家守節九十七歲一

堂四代嘉慶二十五年題准旌表

梁奕一作翼妻陳氏二十一歲夫亡矢志靡他卒年六十四建

坊入祠吳志

謝時對妻陳氏州庠飛熊女欽州學正聯輝孫女年十七結
褊敬事舅姑勤儉宜家越五載夫亡氏欲身殉舅姑諭以勉
撫二孤其後舅姑既沒備歷艱辛歸依外家不廢教育子孫
成立年逾八旬

庠生劉正璠妻溫氏生員宗游次女年十九適劉至二十七
歲未有所出卽勸夫置妾生一子紹基三歲而夫故溫忍死
撫孤以續夫嗣紹基十八歲爲州庠生娶媳何氏生一子寬
而紹基復死媳曰姑能善事祖姑撫吾夫吾豈不能事姑育
子乎亦矢志堅守三載後媳亦亡溫又撫鞠孤孫成立任四
川同知

生員梁必進妻李氏太學生九霄女適梁甫一載而夫卒氏
年二十無子且貧紡績自給矢志不移奉旌入祠

陸氏知縣陸大成女適本州士失其姓名年二十一夫死遺一女誓志自守四十餘年貞白無玷

李見潤

府志作淵

妻戴氏博士大恩女年二十二夫死無子或有

勸之改適者氏曰生而事死而背禽獸之行吾不忍爲撫族姪爲子內外肅然卒年四十有六

梁華妻李氏鄉紳李天錫女生一子慶忠甫三歲華故氏年二十三矢志守節事舅姑倍謹機訓有方子孫成立孀居五十餘年壽終八十

俱同上

庠生李小文妻溫氏廩生炳觀女年十九于歸十載夫亡無嗣飲冰茹蘗誓死靡他康熙四十四年知州胡顯祖令其伯叔各捐膳租選姪李多祿爲嗣年五十四卒

州志

劉中憲妻杜氏二十九歲夫故撫幼子七歲女紅度日後又

喪子偕媳馮氏共保三孫姑婦雙節

貞女黎氏

舊府志作梁氏

未嫁夫死矢志守貞五十餘年

梁貞女未嫁守貞

按此疑重出存之以俟考

何勞湛妻梁氏子婦馮氏姑婦雙節

李爲紀妻謝氏年二十四紀亡遺孤子三人長幼兩男早喪仲子天培少入宮墻長孫世權甲午鄉薦人皆謂善教之力苦守之報云

陸炳妻李氏州庠長遂之長女一載夫亡氏欲以身殉舅姑防禦又絕粒不食其姑攜餐慰強氏性素孝勉食少許黯傷成病而終

李聚萬妻姚氏年二十聚萬死無子舅姑先沒無期功近親以貧故莫肯嗣之者始衣食於父母久之父母亦歿婦故鄉

人子不習針黹乃採薪自給早出暮歸夜則紡績徹旦鄰里或勸之他適節婦曰盡吾力之所至猶足自活一日未死故鬼猶得所依也其他豈樂聞哉數十年無怨色年七十猶鬻薪於市

梁仲撰傳

陳道著妻李氏二十四歲夫故撫孤良彥成立娶媳戴氏生二子良彥又死戴氏年二十三姑媳兩世貞操李壽七十二卒戴亦五十餘而終

採訪冊

王仁妻李氏廩貢李枝玉女年十七于歸一月夫亡家貧矢志紡績養姑擇襁褓幼子鞠育成人無何姑沒子亦亡復擇繼幼孫熒熒獨守苦節三十餘年道光三年知州李文桂具詳請旌

儒童徐師高繼室張氏年十六于歸越三載夫卒孝奉翁姑

撫立繼嗣苦守數十年

儒童梁增高妻李氏年十七于歸兩載夫亡孝奉翁姑撫立繼嗣苦守數十年

儒童梁增壽妻李氏夫早卒矢志靡他孝事舅姑慈育嗣息苦守數十年

儒童李萼貴妻覃氏年二十于歸夫死家貧子幼日勤紡績孝奉老姑教子成立守節二十四年現年五十一歲

儒童何觀伯妻李氏年十九于歸閨四載夫亡孝養老姑擇立繼嗣孀守五十五年現年七十八歲

儒童覃創萬妻戴氏于歸九載夫亡孝事舅姑教子成立孀守十七年以終

儒童江漆妻胡氏年二十一夫亡孀守二十二年

監生何日照妻徐氏年二十夫亡孀守二十六年

儒童杜炳粹妻李氏年二十二夫亡孀守五十八年以上俱於道光三年經知州李文桂具詳請旌

張孝女四川重慶璧山人父啟東任德慶悅城巡檢病篤醫治不效女年十四號祝於天割股作湯以進父不飲母泣告之此湯乃女肉也強飲之卒不起衆爲悼歎

生員溫召妻李氏監生溫願母二十五歲寡家貧勤績性嚴正撫幼孤偶佻撻必不恕恒泣訓曰我寡家貧祇生汝苟墮家聲不若與汝俱死子慎守其訓後能成立卒年六十二何遵妻謝氏生員韶女二十七歲寡忍飢紡績蒙首垢衣教子成立守節四十年

李永璋妻洗氏十九歲寡無子育堂姪爲嗣苦志守節四十

餘年

生員李炯文妻黃氏二十五歲寡貧病連年苦守三十餘年
蘇正洪妻賀氏廣西馬平縣人二十歲寡其夫在馬平病故
扶柩回家貧無靠守至五十八歲卒

李耀垣妻溫氏監生溫願女二十五歲寡撫幼孤事曾祖姑
及姑家貧無供給苦節難堪鄉人憐之貞守四十餘載

溫晌妻羅氏二十七歲寡家貧事姑撫繼子守節四十餘年
壽七十二終

溫繼祖繼妻周氏二十八歲夫亡備嘗貧苦撫子成立現年
六十歲

溫能莊妻劉氏西寧縣生員劉麗孚女子歸三月夫亡家貧
不能立嗣自縊以殉

何順素妻謝氏二十一歲寡守節五十餘年

生員陸振江妻譚氏二十六歲寡守節四十年

李義妻戴氏二十二歲寡七十二歲卒

生員李樹岐妻戴氏二十一歲寡七十三歲卒

李枝幹妻戴氏二十三歲寡現年六十歲

徐組綬妻李氏貢生經緯女二十四歲寡守節三十三年卒

李熹之妻溫氏二十五歲寡姑老子幼藉女紅度活守節三十餘年

十餘年

李伯秀妻謝氏職員謝世蘭女二十一歲寡無子擇姪爲嗣

苦節五十餘年

李清潤妻覃氏江西候補從九覃及亮女二十一歲夫亡痛

毀幾不能生家貧無子撫姪守節三十年

溫榮章妻李氏貢生李世荷女二十七歲身無子事姑敬謹
貧苦不改其操三十餘年

李愈周妻何氏子歸半載夫亡五十餘年

李瀚妻麥氏二十三歲寡苦志守節撫姪爲嗣現年七十九
歲

何銳妻李氏二十六歲寡孀居苦守杜門不出現年六十八
歲

李楚妻溫氏廩生溫廷基女未字聞夫亡泣血奔喪誓不改
適撫姪爲嗣守節四十餘年卒

生員李壇妻何氏二十二歲寡撫育繼子成立守節六十八
年九十歲卒

李澤普妻沈氏二十三歲寡守節五十餘年

徐體仁妻謝氏二十四歲寡守節七十九歲卒

徐興文妻江氏二十五歲寡守節現七十三歲

謝世錫妻何氏二十一歲寡家貧無子撫堂姪慶蕃爲嗣守節五十八年

李貽謀妻周氏十八歲于歸一月夫亡守節現年五十七歲
增生陸龍翔妻李氏二十八歲夫亡家貧紡績育子守節三十餘年

武生麥捷翰妻郭氏職員郭滌長女二十四歲夫亡子女俱
無依兄弟家勤女紅孝養舅姑十餘載生死竭力人無間言
爲夫擇嗣七十八歲而終

監生王印交妻李氏二十五歲夫亡生二女無子以蠶織養
姑育女姑沒擇子入繼後子因貧亡去知州蕭文賢表以節

凜冰霜扁八十而終

謝世華妻李氏二十二歲事孀姑撫幼子以女工度活守節至八十七歲卒

李變妻王氏十七歲于歸未及半載夫亡無子清貧紡績辛苦備嘗堅志守節現年五十七歲

謝元芳妻何氏年二十一歲寡擇子入嗣節凜冰霜年九十而終

李丹輪妻陳氏二十歲于歸二十二歲寡無子守節五十餘年

李亮鑾妻謝氏二十五歲夫亡守節撫育繼子至年七十五歲卒

謝濟烈妻馮氏二十二歲夫亡家貧女紅度活至五十六歲

方以姪爲嗣今年七十一歲

何順川妻徐氏二十二歲夫亡家貧無嗣零丁孤苦依親眷傭工度活今年八十九歲

杜炳文妻李氏二十七歲寡家貧勤儉孝侍舅姑撫育孤子杜門不出現年七十歲

杜鴻基妻梁氏十七歲于歸十八歲夫亡誓不再適堅冰自矢孝事翁姑撫姪爲嗣守節二十餘年

進士溫頤副室黎氏年二十二歲頤卒氏守節五十年卒年七十四

俱同上

右德慶州

故明庠生溫大威妻葉氏賢淑多智事姑董氏尤孝明季流賊剽掠最慘氏所居村曰古悅屋後有樓負山一日報賊至

氏謂夫曰賊至無所得君必不免盍逃諸吾以死衛姑言甫
畢賊至大威倉皇無措氏促之上樓時樓後有巨竹一株梢
畧近簷氏以繩引竹極力低伏謂大威曰君急攀竹吾縱手
竹必騰上乘此可至山也如其計果得脫賊破扉入露刃環
氏詰夫所在氏曰公等利財物耳恣所取夫竄伏此屋中吾
婦人不知也賊週視不可得復露刃逼之氏曰吾姑老子幼
未獲死所然命如秋葉固無俟若等血刃矣向姑再拜急持
刀自刎姑與子痛哭抱持賊義之又聞外援至遂舍去逾年
姑逝夫亦相繼亡氏年三十耳攜子遷居縣西之桂籍里年
八十餘卒孫曾數十人南海程可則嘗壽以詩云象管閨儀
著熊丸母教親勁松原有節寸草自長春王母漿爲玉麻姑
脯是麟蘭階森鳳羽早晚被恩綸

封川草志

伍應弼妻沈氏年二十四夫死勤養舅姑得其歡心嚴以教

子俾克成立雍正五年旌

郝通志

林油然妻黃氏年十八適林九載夫故孀守二十七年夫家

故貧氏黽勉以事舅姑不辭勞瘁乾隆七年題准建坊

吳志

監生植文純

縣志作維翰

妻黎氏年十八于歸八載夫故舅先亡

氏奉事老姑扶持調護無所不周喪葬盡禮守節五十餘年

乾隆七年題旌建坊

陳聖祐妻呂氏年二十八夫故孀守三十一年持躬貞靜事

姑盡孝乾隆八年題旌建坊

孔德修妻蘇氏年二十五夫故奉事舅姑日勤耕作夜勤紡

績守節三十餘載乾隆十三年題旌建坊

俱同上

麥彩珍妻袁氏夫亡子幼矢志撫孤克勤克儉治家有法年

踰七十而終乾隆三十年旌

縣志

廩生蒙思遴妻陳氏守節四十餘年有司表其墓

同上

右封川縣

石顯瑜妻錢氏歸三載夫亡事姑盡孝撫姪承祀孀守數十

年嘉慶十一年旌

縣志

右開建縣

人物六 耆壽

宋

李念台恩授百齡壽官今鶴山縣人

鶴山志

明

李學成年九十七歲

吳志

梁竦寶年九十九歲成化間人妻謝氏亦九十九歲

張文衡年九十八歲

王欽一百歲

李有懷年九十七歲萬厯間人

李通年九十八歲萬厯間人

俱同上

右俱高要人

貢生惠安教諭梁鳳信德清望年九十六歲配劉氏九十三

歲雙壽齊眉世所罕觀文昌橋成知縣王民順敦請兩壽鼓吹導引先行欲躋一邑於仁壽稱異數云

鄉賓劉沛年九十四歲子守讓鄉賓年九十六歲子瑋原武教諭

鄉賓張廷獻年九十三歲

增生劉夢兆年九十一歲子子序貢生

貢生瓊州府教諭葉萬齡淳德重望崇正二年舉境內高年九十四歲

鄉賓潘尙茂年九十一歲雍正六年祀忠義孝弟祠

俱縣志

右俱新興人

戴以順百有二歲

黎起

王公器並九十七歲

生員謝秋光九十八歲

陳子展年九十八歲

俱州志

右俱德慶人

李廷璽百零二歲子舜化年九十六歲孫鴻漸年八十九歲
三代壽考

馮宗湖年八十一歲弟卓山年九十三歲鶴齡年九十八歲
叔宜年九十六歲如石年九十一歲兄弟壽考

李景盛一百歲

李孔揚一百歲

扶景立一百歲

易遂盛九十三歲

麥恩深九十歲

施應岳九十五歲

陸子揚九十七歲

馮振芳九十六歲

馮綜九十二歲

馮伯秋九十六歲

勞建華九十二歲

梁耀五年一百零七歲邑令黃大鵬贈以詩見藝文

呂誠年一百零二歲好學不倦嘉靖十三年賜八品冠帶邑

令造廬詢事考言顏其額曰齒德用彰

楊泮年一百歲

俱縣志

右俱鶴山人

鄉賓石勝遷宏治年授冠帶年九十三歲

張子奇萬歷初登極恩霑冠帶栗帛與鄉飲讀律者幾三十年生平敦厚樂善至其却遺金絕夜奔雖行年九旬有四歲終不以語人通安守張一暘其嗣孫也

鄉賓陳一科萬歷年授冠帶年九十七歲

鄉賓姚天俸萬歷年授冠帶年九十六歲步履如常

鄉賓王高崇正年授冠帶年七十二歲

庠生李應魁妻羅氏百有四歲子孫顯達閨秀垂範壺政流芳今其後人猶書香濟濟洵淑德之休徵也

俱縣志

右俱開建人

國朝

唐常太年一百歲雍正二年建坊

縣志作梁帝太

生員趙鳴炎妻鄧氏百有二歲雍正十二年建坊

並吳志

陳恒岳百有五歲乾隆元年旌

縣志

沈乾登妻鍾氏年百有三歲乾隆元年旌

陳方文年百有二歲乾隆二年旌

俱同上

梁禹球年百有二歲乾隆五年建坊

黎喬伯年百有二歲乾隆八年建坊

林應生年百有八歲乾隆十年建坊

朱堯山年百有三歲乾隆二十三年建坊

陸永彩妻賴氏年百有一歲乾隆二十三年建坊

俱吳志

某妻陸氏年百有四歲乾隆二十五年旌

黃卿相妻陸氏年百有三歲乾隆二十五年旌

譚宗廣年百有一歲乾隆二十七年旌

龍近溪年百有一歲乾隆四十五年旌

李樂善年百有一歲乾隆四十七年旌

張景閑年百歲乾隆五十二年旌

朱鶴年年百有二歲乾隆五十三年旌

謝啟祚乾隆五十一年鄉試注籍九十四歲中式次年會試

後欽賜翰林院檢討街六十年巡撫朱珪以啟祚百有二

歲同堂五代孫曾五十九人奏得加編修街賜壽宇昌文

額

羅相和年百有六歲嘉慶十六年旌

羅懷玉年百有二歲嘉慶十八年旌

傅蒂英妻陳氏年百有一歲嘉慶二十三年旌

廩生余麟翔妻楊氏以子得高官封宜人年百有一歲道光

四年旌建坊

鄭

一作趙

輔國百年有一歲

俱縣志

梁百川桂榮村人年百歲道光七年旌

縣冊

右俱高要人

龍靖國妻黃氏年百有二歲乾隆二年旌

梁帝弼年百歲乾隆十一年旌

呂燦朝年百零三歲乾隆四十九年旌

張仲學年八十二歲妻莫氏亦八十二歲同堂五代

熊秉公年九十二歲同堂五代

陳超宏年九十五歲同堂四代

陳雲光年九十七歲

庠生黃廷容年九十八歲知縣陳申詳熙朝人瑞 恩賜八

品

陳烈年九十二歲同堂五代

陳暎斗年九十八歲同堂五代

庠生周西嶺年九十八歲

李昇耀年九十八歲

吳彥年九十七歲同堂五代

庠生黃中道年九十歲

庠生劉信忠年九十三歲妻吳氏年八十八歲

陳時任年九十一歲

吳國弼年九十七歲

宋殷緒年九十六歲

何琦年百有一歲道光二年旌

黃金始年百有二歲道光二年旌

太學生何靜裕年九十二歲父澤蘭邑庠生年百有三歲子琦年百有一歲道光二年知縣伍鼎臣具詳請旌并書世享遐齡四字予之

黃述遠年九十歲

俱縣志

右俱四會人

潘應宿年九十七歲父豫嘗被仇陷獄應宿追隨服侍罄家贖罪得復庠生衣頂而歸蒙 恩頒賞二次

蘇傑儀年九十一歲蒙 恩頒賞一次母黃氏妻梁氏俱八十五歲

黃文韜年九十一歲蒙 恩頒賞一次

優增生陳正儒年九十二歲

梁廷舉年九十一歲妻劉氏年八十八歲

邑庠生梁天眷年九十一歲妻彭氏年八十二歲

胡承祥年九十八歲蒙 恩頒賞一次

庠生梁廸年九十二歲妻伍氏年九十一歲子坦量孫達鋤等俱生監

潘士燮年九十三歲妻趙氏年八十八歲子奇績庠生孫瑞監生

庠生黎體穎年九十二歲

陳公昇年九十三歲蒙 恩頒賞一次

鄉賓甘光裔年九十七歲妻梁氏年百歲子聞遠媳潘氏孫會海孫媳蘇氏俱壽臻八十以外

葉秀奇年九十四歲蒙 恩頒賞一次

簡時盛年九十七歲蒙

恩頒賞一次

梁華表年九十一歲蒙

恩頒賞二次妻簡氏年亦九十一

歲

彭澤禧年九十一歲蒙

恩頒賞一次

郡廩生張睿察年九十一歲防寇賑飢樂善不倦另見人物

志子憲齡年八十歲

吳唯一年九十五歲蒙

恩頒賞二次

嚴憲年九十歲蒙

恩給以八品頂帶子立已貢生孫良佳

庠生

廩生吳尊光年九十一歲

訓導吳翰年九十九歲

生員梁淮年九十歲

增生甘穀年九十歲

簡仲斐年九十三歲子續武年九十歲

甘覺煥年九十四歲蒙 恩頒賞一次

陳金色年九十七歲蒙 恩頒賞二次妻王氏同庚壽年並

志

生員董紹昌妻葉氏年百歲邀 恩頒賞三次

吳志

黎嘉謨妻李氏百有一歲乾隆三十八年旌

葉顯時年百有三歲乾隆四十五年旌

陳德尊九十三歲妻廖氏亦九十三歲一堂四代

陳作聘年九十六歲

簡評年九十七歲妻黃氏年九十三歲一堂四代

趙則贊年九十二歲一堂四代

廖開業年九十二歲

簡宸年九十七歲 恩賜登仕郎

伍家恕年九十歲 恩賜登仕郎

梁國組年九十四歲 一堂四代

黎勝超年九十四歲

葉吟南年九十六歲

郭扳勝年九十四歲

李元珍年九十四歲 恩賜登仕郎

溫品灝年九十三歲

彭懿孚年九十二歲 恩賜登仕郎

吳達上年九十三歲

黎朝安年九十一歲

馮曉鳳年九十四歲

恩賜登仕郎

區心昌年九十二歲

恩賜登仕郎

俱縣志

右俱新興人

葉南魁年九十一歲康熙九年

恩詔給賜粟帛

李賢秀年九十五歲康熙九年

恩詔給賜粟帛

陳日全年百有一歲

梁燧年一百歲

恩賜八品冠帶

陳朝隆年九十一歲

恩賜八品冠帶

謝萬祥年九十六歲英德教諭謝惠成之祖也忠厚樸直老

年猶手不持杖日行百餘里矍鑠異常妻黃氏九旬偕老健

亦如之

彭志傑年百有二歲

邑庠生譚洪躍年九十一歲子子芳登賢書躍愈謙下鄉黨稱長者

某妻伍氏年百有一歲乾隆二十七年旌

阮通志

右俱陽春人

盧廣居年百有一歲雍正二年建坊

吳志

劉復正年百有一歲雍正二年建坊

謝進士年百有四歲雍正十二年旌

王長龍年百歲嘉慶十七年詳報

黃色通年九十三歲五世同堂嘉慶二十年奏准給予昇平

應瑞匾額

馳贈武信騎尉左達彰之妻梁氏年九十歲逮事祖姑及撫元孫親見七代子三人孫九人長孫膺揚任陽江鎮標千總

曾孫七人元孫一人嘉慶二十年奏准給予七葉衍祥匾額

陳運新年百歲嘉慶二十四年詳報

謝造而年百歲道光元年詳報

俱縣志

右俱陽江人

林喬生妻黃氏年百有一歲乾隆二年旌高明縣人

縣志

梁述典妻曾氏年百有一歲乾隆十二年建坊

吳志

唐發後年百有二歲乾隆四十八年旌

職員楊俊朝年九十七歲五世同堂共二十八人乾隆五十

七年旌

職員彭揚鼎年九十五歲五世同堂共五十一人道光元年

旌

俱縣志

右俱恩平人

黃一鶚年一百歲

林子將年九十七歲雍正元年給八品頂帶俱縣志

程能恭暨妻黃氏俱年九十四歲親見七代五世同堂道光四年 欽賞七葉衍祥匾並緞疋坊價冊采訪

右俱廣寧人

戚廷灝年百有三歲雍正十三年旌

周仲高年一百歲乾隆二年旌

戚士昌年百一歲乾隆二年旌

張正翮妻周氏年百有五歲乾隆二年旌

梁韶裔妻周府志氏年百歲乾隆十一年旌

張弼妻梁氏年百有一歲乾隆二十年旌

司徒景夔年百有一歲乾隆二十六年旌

勞爾兆妻梁氏年百有二歲乾隆三十八年旌

羅以元年百有三歲乾隆三十九年旌

張雲定年百有四歲乾隆三十九年旌

周某妻蘇氏年百有四歲乾隆三十九年旌

鄺崇玉年一百歲乾隆四十三年旌

關某妻李氏年百有三歲乾隆四十五年旌

梁誘焜年百有二歲乾隆四十六年旌

張雲西年百有四歲

譚岳綱年百有一歲俱乾隆四十七年旌

譚逢森年九十歲五世同堂乾隆五十七年旌

蘇吉彥年百有一歲嘉慶三年旌

俱縣志

右俱開平人

李聯聖年一百歲

呂閏生年一百歲

任鼎蛟

劉伊水

劉士虬

馮益

林文椿並九十八歲

容瑤

馮昭

呂兆文

呂省儀並九十七歲

鄧郎標

劉宗猷

馮擴伯

馮名

馮樵山

源尙宗

馮鳴尙

宋應翔

呂梓林

源宗溟

呂裕後

呂洪昌

呂洪瓊

呂起源

麥翌崑並九十六歲

鄧錫爵

古珍

馮官祖

呂廷猷並九十五歲

源利恩

宋神相

呂廷瓊

呂倫之

吳清時

黃啟存

李賦旦

呂嗣隆

庠生呂文遇並九十四歲

屈慶年九十三歲

呂庠生陳達可年九十二歲

呂洪泮年九十一歲

以上俱乾隆元年 覃恩賞給八品耆民

麥翰慶妻楊氏年一百歲乾隆五年旌

阮通志

方嘉餘妻李氏年一百歲乾隆二十六年旌

李宗餘年百有五歲乾隆四十六年旌

呂朝棟年百有二歲五世同堂嘉慶十一年旌

李朝德年百有四歲嘉慶十九年旌

郭麥氏年九十八歲子庠生道光四年呈報

右俱鶴山人

龍肖吾年九十八歲

巫陳氏年百有二歲

楊覺凡年九十二歲妻鄧氏年九十八歲

江耀安年百有三歲

謝茂臻

李衍瑞年並九十七歲

莫石氏年一百歲

梁御國年百有一歲乾隆十六年建坊

聶麗甫州志作登虎年百歲乾隆二十一年建坊

武生徐滔年百有一歲乾隆二十三年建坊

洗錦峯年百有一歲乾隆二十八年旌

貢生謝國隆年百有一歲五世同堂乾隆三十四年旌

歲貢生李國楫妻甄氏年一百有一歲乾隆三十五年旌

貢生劉文光妻郭氏年一百歲乾隆四十二年旌

梁躋宇年九十四歲

州庠李榮長妻黎氏百有二歲乾隆四十三年旌

貢生劉世芳妻李氏百有一歲乾隆四十四年旌

俱縣志

董履豐年百有四歲乾隆五十年旌

增生梁士堅年百有一歲嘉慶元年旌

梁斯任年九十九歲五世同堂嘉慶四年旌

貢生梁濟妻馮氏年一百歲嘉慶二十二年呈報

從九江志林妻伍氏年逾百歲五世同堂道光五年呈報

戚永倫一百三歲道光六年報

訓導李倬妻梁氏一百三歲道光八年報

監生陸士俊妻梁氏五世同堂九十一歲卒卽陸上漣母

陸上漣現年九十五歲五代同堂合州紳士舉報

劉任儒妻彭氏現年九十八歲

右俱德慶人

張穎樸年九十歲

陳國魁年九十三歲

馮汝乾妻孔氏年九十五歲

俱吳志

右俱封川人

姚天俸九十七歲

生員李應魁妻百零四歲

俱吳志

右俱開建人

人物七 方技

劉清 新興

易俗興

易經國

文斗

施通一 俱鶴山

劉清新興人善寫山水以雙筆名家自號潑墨山人耿介絕俗非其人不與言嘗與陳兩式遠遊遍歷三江兩浙江西分巡某慕其名延請入署出示未完小影命成之拂袖而去兩式名金玉質直好學不務名利工詩文博識秦漢古器及唐宋字畫康熙壬申中書舍人李彥瑀典試肇郡或強之應考大書東坡和陶靖節歸去來辭於試卷亦奇士也

新興志

易俗興號履貞玉橋人以岐黃術行於省會富道雅重之子羽九號翹旭術亦精有少年見公來僞作呻吟狀公診其脉曰子固無病明年此月乃真病耳及期而卒有患頭痛欲死

者諸醫皆束手公令飲醴花水至極飽痛愈不可忍呼左右抱持之食頃兩蟲從鼻出病若失曰此蟠頭毒也食人腦腦盡死矣人皆以爲神平生以藥濟人而不索值鄉里稱頌不衰孫雲翔曾孫會朋皆世其業雲翔壽八十四會朋亦八十餘屢赴賓筵時人稱爲四世良醫其族有經國者並有名

志

易經國嘗挾貲遊京師與太醫院翟玉華相厚善翟公曰治東南人病與西北不同汝粵中鮮有知者誤人不少爲歎息者久之時與順德龍山左某偕因共拜翟公傳其術翟公出所著書二各攜其一以歸邑令方顯奉上憲諭考選醫學以經國名上多所奏効常以翟公語告邑之醫士俾無以人命爲戲卒年七子九子若孫及曾孫皆以醫名

文斗字勉柄一字白雲文屋邊人寄居南海以畫名子女皆
教以丹青家貧惟資潤筆以給饗食性亦好吟尤耽奕家人
不以斷炊告雖求畫者踵至漫應之而已香山令彭翥賢尹
也訪之羊城報資寺贈以詩卒年九十三阮通志斗中年喪妻
不再娶子恕庸畫有家法長女定矢志事父斗亦不强與擇
配獨居寡言語鄰里罕見其面頗能詩不多作壽九十四以
畫終其身

施通一竹萌人博通易理精堪輿術嘉慶丙寅雙附兩都議
建文閣于邑城南門外罩山古勞都爭之卜於神延高明區
丕烈爲斷通一先作鶴城形勢論以示衆區見之曰此定論
也旣而卒成之城中多火災邑令屢緣事去官道光癸未毀
人始服通一之先見焉並同上

人物八 雜流

莫英

臣著

陳添爵

李秩原

恩平

余廷萬

鶴山 俱義溪

梁氏

恩平 義婢

莫英字國器肇慶恩平人少時父母命省其姑於沙岡爲賊劫去官兵得之遂誣爲幼男進用入內書館進書辦供用庫授奉御轉副使陞大使侍憲宗皇帝陞內官監右少監諫神仙事忤旨猶陞太監賜蟒衣同列蔣琮譖之降長隨琮得罪憲宗悟前誣稍復奉御監上林苑尋復內官監左監丞復右少監督京倉用薦者復左少監復太監用司禮奉復蟒衣玉帶加總督初琮以郊祀不與賜訕上英卽以大義責之遂見嫌內官梁氏之子斥去其父父自家來也英論以父子之恩不喻出己資歸之憲宗時人或懷惠遺以數千金却之曰吾

日飯一盂耳於吾何有或薦至御司房則辭推東宮伴讀則
又辭取六局官則又辭上使之訪仙術則諫使之建延壽塔
則欲止之會以諫止監上林則曰果充實而已督京倉則曰
出納允而已欲廣近場火道以民怨奏止之倉官吏舊無俸
養則曰是教之偷也奏贍之月糧而弊息暇則焚香好讀書
史至忠義事則義氣益激發或爲之私謀則曰用舍命也或
語之時事則俛而默生景泰元年九月卒正德十二年三月
訃聞上命治其喪

湛露白石
主人傳碑

陳添爵邑貢生鄭獻圖之僕也 國初土賊竊發獻圖居城

中屢進勦賊策於當事賊惡之卒爲賊所殺添爵故鄉居聞

之大慟赴水死

恩平志

李秩原蓮塘村民馮臣智之僕力耕自食有年矣臣智死妻

寡子幼遺產不能贍秩原毅然曰是我責也請於主母代主人耕而盡入其所穫顆粒不以私主母死力營喪葬旣復爲幼主謀婚娶乃泣告曰奴老矣郎力壯可以任耕作母以奴在圖自逸也遂不復預主家事遇節日及故主諱辰則攜雞酒入助祭詢以故主前事輒泣下年六十三而死人謂恩平有兩義僕獻圖之僕舍生以殉主臣智之僕盡瘁以扶孤取徑雖殊其義一也

余廷萬雷州人雅瑤馮達能隨兄任徐聞中軍所買僕也配以卽氏婢能妻胡及子顯覺居故里能遣萬攜妻歸就胡家故貧賴萬竭蹶支持以養胡死萬爲喪葬又出其傭資爲顯覺娶妻李氏而達能卒於徐聞萬扶櫬歸窆不兩載顯覺又亡遺腹一子曰毛歲甫週李挾他適萬卽白諸族衆襁毛歸

與鄔氏竭力撫養稍長送就外傳且爲訂婚時萬年逾七十矣日販烟板榔取錙銖利以供朝夕毛旣長而情好近匪人屢諫不聽萬乃涕泣曰吾所以艱難萬狀而不辭者欲觀成立以繼主嗣也今若此復何望哉遂縊而死

鶴山志

梁氏庠生吳業懿之婢社賊劉盛富者業懿佃人也順治十二年結黨掠沙地業懿被殺妻鄭氏匿他所賊獲懿子宜澍僅四齡將殺之梁給賊曰是吾子也若與主人讐何忍戕吾子賊捨之遂攜以遁宜澍長告之故事梁如母梁亦終身不適人及卒爲立嘗田以祀之宜澍邑諸生子九遊庠者五今子孫且五十餘丁矣邑中稱望族焉皆梁之遺也

恩平志

人物九 仙釋

葛洪

晉

張岳

南朝

劉三妹

何尊師

俱唐

梁果

宋

高顯元

元

林癸午

勞真人

羅清

俱明以上仙類

休咎

惠能

石頭和尚

俱唐

智常

達岸

聰公

俱唐

贊聖

白雲

末山

俱南漢

麥祖用

阮道者

梁道者

惠洪

福靜

祖泰

僧終南

梁月華

忍大師

正照

雙峯

棲壑

在操

阿顛

俱明以上釋類

晉

葛洪字稚川丹陽句容人少好學寡慾無所愛玩究覽墳籍尤好神仙導養之法從祖元學道得仙以其術授弟子鄭隱洪就隱學悉得其法又以師事南海太守鮑大元元亦內學見洪深重之以女妻洪太興中爲將兵都尉攻石冰冰平洪不論功賞已欲避地南土乃叅廣州刺史稽含軍事咸和初于寶薦爲散騎常侍領大著作洪固辭聞交趾出丹砂求爲勾漏令遂將子姪俱行至廣州刺史鄧嶽留不聽去洪乃至羅浮煉丹優游閒養著述不輟自號抱朴子因以名書後忽與嶽疏云遠行尋師尅期便發日中兀然若睡而卒舊志則云洪從羅浮至德慶遍遊名山乃於晉康鄉儒林富祿里崗心社山作丹灶煉藥躑躅花遺跡尙存一統志有舊仙園在社

山頂今屬東安

吳志

南朝

張岳字彥高封川人仕齊爲司空以諷諫不從遂弃官入長沙溫泉山舉家茹素誦大洞真經二十年不懈適有人持藜杖踵門謂之曰吾葛洪也奉帝命授子明訣宜力行之待功圓滿曰再晤岳自此漸精進梁天監二年秋夜聞空中有詰旦可攜家登山上語厥明從之留一婢盧瓊守舍忽有羽客身疾癰瘡至問司空何在瓊曰登山去問酒何藏瓊指其處羽客就之倒甕中酒澡其身罷復納諸甕乃去致語云司空歸道葛道人過訪少頃岳歸瓊具言岳趨視其酒聞異香滿室遂呼闔家人皆飲瓊親見其澡狀故託病謝之岳飲罷乃沐浴更衣召諸弟子曰子今別汝儕赴上帝召也言訖祥雲

羣芳譜 卷二十一
絲繞空中擁鸞鶴而下舉家駭之上昇勅瓊守壇不得與上同

唐

劉三妹新興人生唐中宗時年十二善爲歌游戲得道往來
兩粵溪崗間解諸蠻語後與白鶴鄉一少年登山而歌入環
觀之七日夜歌聲不絕俱化爲石

粵中見聞

按舊府志載劉三妹新興人世傳在開建水石巖中
脩行得道風晨月夕機聲遠聞八巖視之則莫見其
形今巖內有機杼石又陽春縣志銅石巖劉三妹羽
化處但云不知何代因列入明朝粵中見聞云生唐
中宗時必有所據考輿地紀勝有劉三妹歌仙石是
宋以前已有此說矣

何尊師不知何許人龍朔中嘗往來封康間來無所慕去無

所數至百餘年人常見之狀貌不改如四十者行步如風人問氏族但云何何詰其鄉里亦云何何人因號爲何尊師

吳志

宋

伏虎仙師姓梁名果廣寧人得道成仙每入山取薪夜則騎虎而歸尸解於烏石潭有虎銜其尸置菴中設祭一七歲時鄉人祀祭今其肉身尙存

元

高顯元開建人元至正間隨父徙居懷集幼穎異稍長涉獵經史喜絲竹之音年八十八卒後數年復歸開建娶鄰女莫氏爲妻同見父形貌如生父駭異之未幾而去周遊開建賀州四會連陽之間時顯靈異至正間入闕見惠宗自言齊志而沒有年矣幸錫一命帝敕以南山掌嗣續之事欣謝而歸

至懷集廣寧三宿山壘石成岩而居焉每風晨月夕人有聞
絲竹聲從岩中出者凡祈嗣禱雨輒應四境多爲立廟

俱同上

明

林癸午不知何許人年十餘投陽江北慣都爲人牧豎每出
牧止有簫管一枝箕踞自適牛有逸者取簫畫地中牛不敢
踰晚歸所吹簫度高篁中篁俯地受寄若有神伺之者既長
乃忽習巫求神治病應口而愈河畔一巨石狀如犬午每浴
必坐嘯其中或至移日忽一日謂其徒曰余當以來日昇矣
其徒嗤其誑比往候之迄不及人傳與石俱飛事在萬歷初
年

陽江志

勞其人名勲四會人年二十二妻歿不再娶乃學道教遂精
其術治邪魔符咒立應言吉凶皆驗及卒鄉人往往過於道

與語無異生平弟子私號曰勞真人

羅清四會人少事道教往武當從師受法遂能役使鬼神禱雨立應邑有魔邪爲害以法滅之今英德有羅公祠以上仙類

唐

休咎禪師姓梁新興人唐武后時遊羅浮山乾和中節度使李復初迎至扶胥鎮夜憩南海廟有青衣童子曰此鎮海將軍廟也師何以至師曰欲見王耳童曰王暫遊海師少待三鼓雷電風雨飛砂走石須臾息止天地豁明使者廷立王歸謁請事師曰擬欲王捨此廟爲伽藍王曰天遣鎮此歲多嘉宰無時非駐錫地當爲別擇言竟辭去五鼓還謂師曰此去五里以楮紙鎮四隅者是已比明師至其地遂建菴以居師語王曰聞王性嚴急舟楫遇風溺覆者衆願王勿爲王卽受

三歸五戒師留住海光寺卒賜諡休省大師缺

惠能父盧氏諱行瑫

六祖大師緣起外紀

本貫范陽左降流于嶺南作

新州百姓

經壇

李氏夢庭前白花競開白鶴雙飛異香滿室覺

而有孕懷六年師乃生貞觀二十年二月八日子時也黎明

有二僧造謁謂師父曰夜來生兒專爲安名可上惠下能也

言畢不知所之師不飲母乳遇夜神人灌以甘露三歲喪父

母守志鞠養

外紀

移來南海艱辛貧乏于市賣柴有一客買柴

令送至客店出門見一客誦經一問經語心卽開悟問誦何

經曰金剛經復問從何所來客云從蘄州黃梅縣來便往黃

梅叅禮五祖五祖問曰汝何方人對曰是嶺南新州百姓祖

言汝是嶺南人又是獼獠若爲堪作佛惠能曰人雖有南北

佛性本無南北祖令隨衆作務惠能曰未審教作何務云若

槽廠去

壇經

祖一日會衆傳法弟子神秀呈偈出于壁間身是

菩提樹心如明鏡臺時時勤拭拂勿使惹塵埃能不識字聞

人誦之乃爲偈請人書其側曰菩提本無樹明鏡亦非臺本

來無一物何處惹塵埃

錄指

祖見之恐人損害將鞋擦偈曰

亦未見性次日祖潛至碓房見能腰石舂米問米熟也未惠

能曰米熟久矣祖以杖擊碓三下而去能卽會意三鼓入室

經壇與能說金剛經言下大悟卽以達摩所傳衣鉢授之

嶺海各勝

記曰衣爲爭端止汝勿傳若傳此衣命如懸絲須速去恐人

害汝能曰向甚處去祖曰逢懷則止遇會則藏五祖送至九

江驛舍上船能隨卽把舫祖云合是吾渡汝能云迷時師渡

悟了自渡祖云如是如是以後佛法由汝大行行至大庾嶺

後數百人來欲奪衣鉢一僧俗姓陳名惠明先是四品將軍

性行粗糙爲衆人先能擲衣鉢于石上曰此衣鉢信可力爭
耶惠明提掇不動作禮云望行者爲我說法能曰不思善不
思惡那箇是明上座本來面目明言下卽悟而去後至曹溪
又被惡人尋逐乃於四會避難獵人隊中凡經一十五載獵
人常令守網每見生命盡放之每飯時以菜寄煮肉鍋或問
之對曰但吃肉邊菜一日至廣州法性寺值印宗法師講涅槃
經因二僧論風旛義一曰風動一曰旛動能曰不是風動
不是旛動仁者心動一衆駭然印宗延至上席云久聞黃梅
衣法南來莫是行者否能曰不敢于是爲惠能剃髮願事爲
師壇經時儀鳳元年正月十五日也五燈會元次年春師辭衆歸寶
林至曹溪堂宇湫隘不足容衆欲廣之遂謁里人陳亞仙曰
欲就檀越求坐具地仙曰和尚坐具幾許濶出坐具示之亞

仙唯然祖以坐具一展盡單曹溪四境四天王見身坐鎮四
方今有天王嶺因茲而名仙曰知和尚法力廣大但吾高祖
墳墓坐此地他日坐塋幸望存留餘願盡捨遂成蘭若一十
三所寺殿前有潭龍常出沒其間觸撓林木一日現形甚巨
師叱之曰你只能現大身不能現小身俄頃現小身躍出潭
面師展鉢曰你敢入老僧鉢裏龍游揚至前以鉢啗之與龍
說法遂脫骨去骨長七寸尾角足皆具留傳寺門後以土堙
其潭殿左側鐵塋是也龍骨於至正己巳寺罹兵火失去外紀
能住韶州廣果寺山中多虎豹一朝盡去遠近驚歎咸歸伏
焉神秀常奏則天追惠能赴都固辭神秀又作書重邀之能
謂使者曰吾形貌短陋比上見之恐不敬吾法又先師以南
中有緣亦不可違也舊唐書中宗遣內侍薛簡馳詔迎請亦

不奉詔遂送百衲袈裟及錢帛等以供奉養

錄傳燈

太極元年

七月八日忽謂門人吾欲歸新州汝等速理舟楫大眾哀留師曰諸佛出現猶是涅槃有來必去理亦常然又問此後有無難否曰吾滅後五六年當有一人欲取吾首聽吾誡曰頭上養親口裏須飧遇滿之難楊柳爲官先天二年八月初三日端坐至三更謂門人曰吾行矣奄然遷化于時異香滿室白虹屬地廣韶新三郡官僚泊門人緇白爭迎真身莫決所之乃焚香禱曰香烟指處師所歸焉香烟直指曹溪遷神龕而四弟子方辯以香泥土之門人念取首之記遂以鐵葉漆布固護師頸春秋七十有六

壇經

師八塔後至開元十年八月

三日夜半聞塔中如拽鐵索聲衆僧驚起見一孝子從塔中走出尋見師頸有傷具以賊事聞於州縣縣令楊侃刺史柳

撫忝捕得賊人鞠問云張淨滿汝州梁縣人于洪州開元寺
受新羅僧金大悲錢二十千令取大師首供養柳守至曹溪
問師上足令韜如何處斷韜曰若以國法論理須誅但佛教
慈悲况彼求供養罪可恕矣遂赦之上元二年肅宗遣使請
衣鉢供奉永泰元年代宗夢師請衣鉢勅刺史楊絳云朕夢
感能禪師請傳衣袈裟却歸曹溪今遣鎮國將軍劉景崇頂
戴而送可于本寺如法安置憲宗諡大鑑禪師塔曰元和靈
照宋太宗加諡大鑑真空禪師太平興國之塔仁宗天聖十
年具安輿迎真身及衣鉢入大內供養加諡大鑑真空普覺
禪師神宗加諡大鑑真空普覺圓明禪師本州復興刹宇事
蹟晏殊所作碑記具載以後宋加諡廣照肉身迄今猶存

六祖

又起

後有微公居寺中頗知佛法

嶺海名勝記

師自黃梅得法回至韶州曹侯村人無知者時有儒士劉志畧禮遇甚厚志畧有姑爲尼名無盡常誦大涅槃經師聽卽知妙義遂爲解說尼乃執卷問字師曰字卽不識義卽請問尼曰字尙不識曷能會義師曰諸佛妙理非關文字尼驚異之遍告里中云此有道之士宜請供養有曹叔良及居民競來瞻禮時寶林古寺自隋末兵火已廢遂於故基重建梵宇延師居之俄成寶坊

壇經

石頭和尚高要人姓陳名希仙六祖弟子常叅清源山思和尚唐天寶中之衡山南嶽寺寺東有石狀如臺師乃結菴於上號石頭和尚門人問曹溪音旨誰人得師曰會佛法人得曰師還得否師曰我不會佛法僧問如何是解脫師曰誰縛汝又問如何是淨土師曰何人垢汝問如何是涅槃師曰誰

將生死與汝所著有叅同契注元和中化去壽九十有一建

塔於東嶺長慶中謚無際大師

阮通志

志常六祖弟子得法曹溪歸隱頂湖白雲寺今大龍湫下有

涅槃石其入定處

頂湖山志

達岸禪師新興人名志清九歲出家十九往南華受六祖戒
後至廣州結草菴於大通鎮之東師化身在焉每遇旱禱雨

即應

新興志

聰公新州人姓譚生南漢時自幼嗜佛往南華叅見六祖遂
爲沙彌持戒律甚肅忽一日夢祖師語曰今夜三更吾當有
難汝能救我乎其後寺火焚至塔前乃祖師圓寂之處寺僧
移之弗動惟聰昇出門衆大驚異嘗欲航海往普陀落伽山
夜夢祖師云我昔有難荷汝護持汝今南行當爲汝說逢東

則住逢林則止又曰早結菩提緣能救衆生苦聰密記夢中之語遂止清遠東林寺曰徃寺之西採蘆葦造筏凡數百維於江潯邑人恠之踰旬有寇暴起八境邑人賴筏渡於南岸得免寇退人競以金帛酬之而聰已於竹林中坐逝矣寺僧以香泥塑其身奉之

黃通志

南漢

贊聖禪師姓盧名道倫新興人童時削髮遊韶州雲門寺事洪智大師得悟佛法後回新州居龍境山法相禪院坐化其徒并縣人塔而瘞之踰三年塔忽自裂光明皎然啟塔出之金剛色凝自若南漢王贈洪直廣福贊聖大師

黃通志

白雲禪師名實性封川人原名志庠陳姓受記曹溪稱爲雲門嫡嗣南漢王嘗延之開山建刹名曰白雲因以爲號余襄

靖謂其非獨翫雲霞之容同禽魚之樂蓋將脫聲利八查靈
湛如太虛也性之後曰志文曰契本曰達真曰妙光曰惠龍
五世皆傳燈具眼云

吳志

末山尼了然禪師居端州爲大愚法嗣有滙溪閑和尚者來
山問今日離何處曰路口山曰何不蓋却閑乃禮拜問如何
是末山山曰非男女相閑乃唱曰何不變去山曰不是神不
是鬼變箇是麼閑於是伏應作園頭三載

惠洪詩
方圓註

宋

麥祖用高要人自雲蓋山修行與浮屠居止數十年人莫得
見其面後出廣州光孝寺四方嚮慕瞻禮如市一日澡沐端
坐而化

吳志

阮道耆四會人姓阮字子郁居周村少學浮屠氏不茹葷妄

言能持戒定時人號爲阮道者忽一日作偈端坐卒邑人乃於橄欖村建菴以奉焉遇旱禱之輒雨紹定間敕封慈應大師肉身尙存

梁道者四會人名慈能幼出家寶勝寺爲行者常癬疥藍縷終日不語募乞所得無問識不識輒以予之時人莫測也一日無疾而化鄉人異之卽其地構菴以祀號化師臺元縣尹

歐陽芳有記

俱同上

惠洪覺範姓喻氏高要人少孤能緝文張天覺聞其名請住峽州天寧寺以爲今世融肇也天覺當國度爲僧易名德洪數延入府中及天覺去位制獄窮治其傳達言語於郭天信竄海南島上

郡齋讀書志

僧福靜封川人姓黎少而出家禪行高潔天聖七年方十三

歲治西山寺識經得度爲方外遊若英之峽山韶之南華新之龍山無不託息嘉靖間歸住光孝寺與郡守田開爲詩友熙寧八年五月一日說偈集衆趺坐而逝

吳志

祖泰高要人姓容性質純古自童稚不喜葷酒年十二出家時因世變泰避地還家舊林住四會之華嚴寺復住城東之天寧寺凡五載退處容水之羅園山作菴以休左丞王安中右丞張微樞密路允迪學士賈讜郡守竇仲塗皆從之遊菴中有會英堂四相軒爲諸名公會集之所祖泰實靈源法嗣臨濟正派云

同上

明

僧終南名如正不知何許人也少祝髮高要之慧日寺遂住焉律操特嚴募米一缶盈卽捨去崇正間遊羅浮山因避明

亂止惠州古榕寺凡十餘年不出一日具湯沐薙髮與徒屬
义手作别且曰屠三載當發余碱慎識之毋不及期虧折四
大言訖西向結趺化後歲餘有潰軍數十人突入寺見其碱
欲發之僧以狀告懇求甚力軍益疑之及發則一寂僧屹然
定坐髮薙復出蒙茸披面手足指甲長一目陷落如眇唇亦
少縮軍衆環視感歎羅拜而去又數載閩人林崇孚知府事
夢一僧伽黎垢敝衣來謁自疏其名若有所懇如是者再疑
其有冤也揭其名以求得之親往瞻拜仰視碱中如前夢所
見無異大駭服一郡皆傾男女炷香念佛而來者以千百計
道路如織爭布金新其刹居之今肉體在焉

吳志

梁月華恩平簞箕村人明永樂間至古博走馬岡成佛臨化
囑其鄉人曰早卽禱我輒應鄉人立祠岡上祀之號曰悟覺

禪師

忍大師者不知何許人曾因避難居廣寧之龍龕寺萬厯初村人值旱祈雨山麓間忽起白雲遙見一白衣人影嚮雲際咸踴躍羅拜俄而雨遂滂沱衆皆詫異因躡向者雲起處見其地崩摧少許獲一石碑自述自龍龕始末終有二語云龍龕藏錫杖衣鉢在南華其餘語今不可復考鄉人神其事遂建寺以奉焉

僧正照羅陳人爲國恩寺住持與邑尉鄭昕邑紳嚴貞修寺宇以所有功佛寺塑昕小像納佛腹中預爲識記曰後九十六年佛遷像出逮隆慶四年重修殿宇毀佛相得昕像年月悉符所志

雙峯禪師開平登明里牧童一日牧牛於岡坡坐化成佛異

禱輒應

棲壑和尚道邱字離際順德龍山柯氏子母陳氏夢老僧偕宿而娠生時室有異光少志願出家雍祝後侍憨山大師于寶林通內外典籍遂辭憨師度嶺至金陵親雪浪一雨深究宗趣令爲嗣講復如杭叅蓮池大師師授以淨土法門并付衣鉢後入江右侍博山無異和尚久之又入匡廬會同叅家宗保禪師于金輪歸廣州聞者爭謁陳秋濤梁未央延住白雲蒲澗學者輻輳共坐枯木床種田博飯一日訪六祖新州路出端州望頂湖山水秀麗策杖而入知爲福地遂開山焉先是地主梁少川與清波延僧構菴其中共結淨社招陽江朱子人主之聞師至請爲住持遂成大刹內有涅槃臺慶雲

禪院寮舍僧房非萬金不能建師談笑而成之愁大師曾遊
此峯懸記曰不久有至人于茲開山記以詩曰蓮花瓣瓣湧
滄溟寶殿高高傍七星白晝雲封無犬吠夜深說法有龍聽
至是果驗僧嘗至數百衆寺無擔石之儲所給皆付龍天方
伯胡公嘗密與監寺雲傳募金千兩有奇擬置田齋金入山
師卻不受立不置田產之約謂釋子修行龍天擁護四字自
足何用田爲而開山十年用度未嘗困乏殿前波羅樹枯萎
師咒水灌之復茂重修大雄寶殿大木來自海隅難于轉運
忽而大雨如注三日溪水暴漲丈餘木直抵山不越月而梵
宮成後白蓮花盛開師無病索筆書蓮花頌而逝

五山志林

在操禪師新會朱氏子居陽江閱藏經有所觸發遂矢出世
志崇正間訪道端州時高要廸村人梁少川爲父母卜兆於

頂湖山蓮花洞夢神訶云此朱家地非爾所有會師至姓與
夢符遂捨地與師誅茅建菴居焉旋禮棲壑和尚於蒲澗薤
祝受具以大事未明矢志叅方迎棲和尚王頂湖遂度嶺徧
叅雪關餅窖雲門徑山天童諸尊宿乃還粵謁曹溪居英德
之西來山順治戊戌棲公示寂衆奉師繼席後於南海麻奢
鄉建寶象林居焉先是鄉人每見其地湧紫氣成大蓮花至
是果成名刹師往來兩山所成就者甚衆嶺南咸以得頂湖
戒爲重示寂時壽七十五塔於慶雲寺禪院之右前後著述

百餘卷

吳志

阿顛者不知其所從來投居端州白雲山僧寺時爲僧采茶
雖寒甚不肯衣布自編草作衫褲織爲履比其足倍長闊曳
之行或挂之杖頭壁間或食或不食時入深林處呼之多不

應與人語多不可解因共呼爲阿顛其腰間有如黑石者二
無事則出就火燒之見人來輒從火中取出收還故處曰燒
未熟熟時可與爾食視其睡席則當中有雙手掌痕中夜聽
之喃喃不知何爲山故多虎一日啞二牛去僧戲謂爾可爲
尋之顛忽編草爲索曰請繫之至旣薄暮望之不見還返照
射入峻坂上雲破處忽見其以草索環一白額虎頸虎跳躍
則與之皆跳遙見人則益以拳鼓虎領持其耳急來至寺門
前引虎頸中索鞭背腹至數百乃聽去虎垂尾疾走若犬畏
人擊狀以此異之

蓮鬚閣
文集

人物十
流寓

劉熙

袁渙以上漢

程秉

許靖

許慈以上吳

李邕

許渾

宋之問

李羣玉

羅隱以上唐

蘇軾

巢谷

李璆

高儼

陳與義

李綱

梁端

葉如璋

梁克家

趙善護以上宋

甯杲

李璋

李珣

余寬

王杲

馮恩

陳獻章

沈思孝

方以智

曾和應

李來

何符聖

陳有惇以上明

孫應機

連城壁

以上

國朝

漢

劉熙字成國北海人博覽多識名重州黨建安中薦辟不就
往來蒼梧南海客授生徒數百人作釋名二十七篇自爲序
又著諡法三卷行於世

郭棐粵
大記

按熙後漢書無傳惟見于三國志許慈薛綜程秉韋
曜傳中而晉書無考隋書經籍志載劉熙釋名八卷
諡法三卷云後漢安南太守劉熙注檢郡國志無安
南郡漢陽郡注引秦州記云中平五年分置南安郡
安南或南安之誤也李石續博物志稱爲漢博士劉
熙書錄解題文獻通考俱云漢徵士北海劉熙字成
國當是古本釋名所題如此然與隋書經籍志續博

物志不同范書又以釋名爲劉珍撰吳志韋曜傳云
見劉熙所著釋名作辯釋名曜與熙時代前後相去
不遠其說可信劉珍所撰別一釋名耳然熙之事實
言人人殊莫能是証尋釋許慈諸傳其避地至嶺表
無可疑也卽郭棐之言亦必本明以前舊志非漫然
無稽之談茲錄粵大記一則以諸說爲案語於後

阮志

袁渙陳郡扶樂人從弟徽

後漢紀作徽

以儒素稱魏志本傳時天下將

亂渙與徽閒居從容謀避亂之地渙慨然歎曰漢室陵遲亂
無日矣苟天下不靖逃將安之若天將喪道民以義存惟強
而有禮可以庇身乎徽曰古人有言知幾其神乎見幾而作
君子所以元吉也天理盛衰漢其已矣夫有大功必有大事

此又君子之所深識退藏於密者也且兵革之興外患衆矣
徽將遠蹈山海以求免乎天下淆亂各行其志徽避地至交
州袁宏後漢記司徒辟不至本傳

按袁徽裴松之袁渙傳引後漢紀亦作徽今本漢紀
作微乃傳寫之訛黃通志云徽字慎卿不知所本徽
依士燮與荀彧書見士燮傳阮通志

吳

程秉字德樞汝南南頓人也逮事鄭元後避亂交州與劉熙
考論大義遂博通五經士燮命爲長史權聞其名儒以禮徵
秉旣到拜太子太傅卒於官吳書本傳

許靖字文休汝南平輿人與弟劭俱知名而私情不協劭爲
郡功曹排擯靖不得齒敘以馬磨自給劉翊爲汝南太守乃

舉靖孝廉除尙書郎典選舉董卓秉政周彪爲吏部尙書與靖共議謀進退天下之士拜韓馥爲冀州牧孔伯爲豫州刺史張邈爲陳留太守遷靖巴郡太守不就補御史中丞馥等到官舉兵誅卓卓怒彪曰諸君言當用善士從君計諸君所用人至官日還來相圖卓何用相負叱彪斬之靖懼誅奔伯仲卒依揚州刺史陳禕禕死吳郡都尉許貢會稽太守王朗與靖有舊故往保焉靖收恤親里經紀賑贍孫策渡江走交州避難靖身坐岸邊先載附從疎親悉發乃從後去見者莫不歎息旣至交趾太守士燮厚加敬待鉅鹿張翔銜王命使交部乘勢募靖欲與誓要拒而不許靖與曹公書曰昔在會稽得所貽書辭旨欸密久要不忘迫于袁術津塗四塞雖懸心北風欲行靡由正禮師退術兵前進會稽傾覆景興失據

便與袁沛鄧子孝等浮海至交州漂薄風波絕糧茹草饑殍
荐臻死者大半旣濟南海與領守兒孝德相見知足下忠義
奮發整飭元戎西迎大駕承此休問且悲且喜卽與袁沛徐
元賢復共嚴裝欲北上荊州會蒼梧諸縣夷賊蠡起州府傾
覆道路阻絕元賢被害老弱並殺靖尋循渚岸五千餘里復
遇疾癘伯母隕命並及羣從自諸妻子一時略盡復相扶持
前到此郡計爲兵害及病亡者十遺一二生民之艱豈可具
陳哉翔恨靖之不自納搜索靖所寄書疏盡投之水後劉璋
使使招靖靖入蜀爲廣漢太守建安十九年先主克蜀以靖
爲左將軍長史及卽尊號策靖司徒章武二年卒蜀書本傳
許慈字仁篤南陽人師事劉熙善鄭氏學治易尙書三禮毛
詩論語建安中與許靖等俱自交州入蜀爲博士後主時稍

遷至大長秋卒

同上

唐

李邕字泰和揚州江都人後從中人楊思勗討嶺南賊有功徙豐州司馬邕長於碑記人奉金帛請所受鉅萬計惟豪侈不拘細行請託賄謝敗遊自肆終至敗亡

唐書本傳

按太平寰宇記石室唐北海李邕有記鐫石存焉吳志今崧臺石室有邕大書景福字又嘗作石室記時開元十五年而思勗討平瀧州首領陳行範乃十六年蓋從思勗時過此記稱陳州刺史舊秩也

許渾字仲晦丹陽人以詩名太和六年進士爲令大中三年任監察御史常奉命南海來往新興道中登巨福峽山避暑

多所題咏

新興志

宋之問字延清汾州人中宗時爲修文學士後貶嶺南經賁
康有青林暗換葉紅葢續開花之句見高要志
德慶州志

李羣玉字文山澧州人大中間授宏文館校書郎嘗自五羊
來訪桂州經過康地有一院蕉聲暮半庭春影斜之句德慶志

羅隱字昭諫錢塘人也一曰新登人本名橫累舉進士不第
遂更名隱隱池之梅根浦自號江東生光啟中錢鏐辟爲從
事節度判官嘗遨遊南粵粵人慕之呼爲羅給事或呼羅江
東多紀其蹟以爲勝事而廣寧山水清峻尤其所喜盤桓久
之廣寧志

按唐書昭諫並未度嶺故通志不採廣寧志殊不足
信姑存而辨正之

宋

蘇軾元祐名臣其徙昌化軍也自循州之瓊取道新會值漲水暴漲不能進留止浹旬見石螺岡林壑幽勝顧而樂之居人爲築亭以居之後人名其亭曰坡亭自名其鄉曰坡山里

曰東坡里

鶴山志

巢谷初名穀字元修眉山農家子舉進士不利去遊秦鳳涇原間所至友其秀傑蘇軾兄弟在朝貴顯谷浮沉里中未嘗一見及謫徙士大夫皆諱與之遊平生親友無復相問者谷獨慨然自眉山欲徒步訪之聞者皆笑其狂元符二年正月自梅州遺轍書曰我萬里徒行見公今至梅矣不旬日必見死無恨矣轍驚喜曰此非今世人古之人也旣見握手相泣已而道平生逾月不厭時谷年七十有三瘦瘠多病將見軾於海南轍憫其老止之曰君意則善然循至儋數千里復當

渡海非老人事也谷曰我眎未卽死公無止我聞其窆中無數千錢轍方困乏強資遣之行至新州遂疾卒轍聞之哭失

聲

集

李璆字西美右文殿修撰建炎三年寓新州

新興縣志

高儼字思正國子司業建炎三年寓新州

見同上

陳與義字去非洛陽人政和中進士累遷符寶郎謫監陳留酒稅及金人入汴避亂襄漢轉湖湘踰嶺嶠寓廣州登海山樓題咏而去紹興元年艤舟過康州與學士耿伯順給事李德升舍人席大光侍郎鄭德家夜語分韻賦詩所著詩號簡齋集陳獻章酷愛之有刪後詩人又簡齋之句

吳志

李綱字伯紀邵武人也自其祖始居無錫政和二年進士官至太常少卿高宗卽位拜尙書右僕射兼中書侍郎上十事

擬姚崇要說力爭張邦昌僭逆當罪殛而贈恤死義諸臣奏邊事乞降哀痛之詔上皆從之尋爲黃潛善汪伯彥所沮御史張浚遂劾綱買馬招軍之罪詔罷之許翰言綱忠義太學陳東言潛善伯彥不可任綱不可去于是殺東罷翰落綱職居鄂州復徙萬安行至德慶抱疾自號梁溪病叟多所題咏今所存者香山豁然亭石刻一篇而已

梁端龍圖學士靖康間避地康州遊憩山水吟咏頗多遺逸

莫紀惟遊洞心一詩今尙存

並德慶志

葉如璋字德成奉議郎紹興二年寓新州

新州志

梁克家字叔子泉州晉江人幼聰敏過人過目成誦

宋史本傳

有郭姓者作四會簿尉克家嘗館焉

方輿勝覽

克家以紹興三十年

狀元及第官至宰相封儀國公贈少師諡文簡因名其館曰

相堂遺趾猶存子孫居其地吳志

趙善護字德潤朝奉郎清熙五年寓新州因家焉同上

明

甯杲山西人歷官巡撫都御史正德間江彬誣誤戍雷州寓

居高要後宥歸吳志

李璋字德芳順天府通州人由進士歷官巡撫都御史嘉靖

初大獄起上命張孚敬桂萼方獻夫爲三法司鞫五臺縣納

粟指揮張寅非妖人李福達遣原問御史馬錄及都御史李

璋等謫戍而李璋戍雷州過高要遂寓焉尋於孝肅祠旁構

小亭吟咏其間又於城西北隅構一壺亭環植花草以自娛

所著有南戍稿居十餘年竟卒於端子鐔隨侍後舉進士爲

都察院都事陳情代戍朝論避之歷官按察使每遇端人若

鄉曲焉辛酉志

李珏山東開州人由進士歷官巡撫都御史謫戍雷州與李璋同寓於高要士大夫相與吟咏爲樂珏形迹稍存若璋則雖鄉人油然而居也珏後赦還召爲大理寺卿高要縣志余寬字約中臨海人進士爲吏部文選郎中嘉靖初議禮謫戍寓高要有才名學者多歸之後赦還

王杲字景初汶上人正德九年進士嘉靖中累官戶部尙書時國儲告匱諸邊請增餉無虛月四方多水旱杲掌邦計事無不辦帝深倚之後有詔買龍涎香久不進帝以此不悅給事中馬錫劾杲及巡倉御史艾樸受賄並下獄遣戍明史杲本傳戍雷州寓高要之崧臺書院子世雍爲按察副使棄官來省未幾遣歸世雍東裝戀戀未行一夕杲與客奕五鼓遽卒述

扶觀歸志

俱著

馮恩字子仁華亭人嘉靖五年進士擢南京御史十一年冬
彗星見詔求直言恩以天道遠人道邇乃備指大臣邪正而
極論大學士張孚敬方獻夫右都御史汪鋐三人之姦謂孚
敬根本之彗鋐腹心之彗獻夫門庭之彗三彗不去百官不
和庶政不平雖欲弭災不可得帝得疏大怒逮下錦衣獄究
主使名恩曰受榜掠瀕死者數語卒不變明年春移恩刑部
獄帝欲坐以上言大臣德政律致之死尙書王時中等言恩
疏毀譽相半非專頌大臣宜減戍帝愈怒曰恩非專指孚敬
三臣也徒以大禮故仇君無上死有餘罪時中乃欲欺公鬻
獄耶恩竟論死長子行可年十三伏闕訟冤日夜匍匐長安
街見冠蓋者過輒攀輿號呼乞救終無敢言者時鋐已遷吏

部尙書而王廷相代爲都御史以恩所坐未當疏請寬之不

聽比朝審鉉當主筆東向坐恩獨向闕跪鉉令卒拽之西面

明史本傳恩厲聲曰吾此膝跪朝廷耳豈爲汪鉉屈跪耶世濟錄鉉

曰汝屢疏欲殺我我今先殺汝恩叱曰聖天子在上汝爲大

臣欲以私怨殺言官耶且此何地而對百寮公言之何無忌

憚也吾死爲厲鬼擊汝鉉怒曰汝以廉直自負而獄中多受

人餽遺何也恩曰患難相恤古之義也豈若汝受金錢鬻官

爵耶因歷數其事詆鉉不已鉉益怒推案起欲毆之恩聲亦

愈厲廷相與尙書夏言引大體爲緩解鉉遽署情真恩出長

安門士民觀者如堵皆歎曰是御史非但口如鐵其膝其膽

其骨皆鐵也因稱四鐵御史明史本傳刻所與鉉爭辨語鬻之市

四夷貢使爭購以歸世濟錄恩母吳氏擊登聞鼓訟冤不省又

奎慶府志 卷二十 人物 流寓 全

明年行可上書請代父死不許其冬事益迫行可乃刺臂血

書疏白縛闕下通政使陳經爲入奏帝覽之惻然令法司再

議尙書聶賢與廷相言前所引律情與法不相麗宜用奏事

不實律輸贖職帝不許乃言恩情重律輕請戍之邊徼制可

遂遣戍雷州而鉉亦後兩月罷

明史本傳

恩寓高要邑士皆從其

遊著作甚富

舊志

越六年赦還

明史本傳

陳獻章字白沙新會人曾遊寓康州愛其形勝多有題咏

吳志

沈思孝字純甫嘉興人隆慶戊辰釋褐令番禺召爲刑部主

事萬厯丁丑江陵張居正秉政有父喪上勉留甚思孝與員

外郎艾穆上疏論之上怒兩人皆杖發戍穆戍潯州思孝戍

神電衛肇慶府同知蔡懋昭防海駐陽江延思孝至爲築借

山亭居之海忠介爲之記思孝旣居陽江粵中豪傑無不至

者日相與賦詩談藝江陵卒召還仕終左侍郎在粵所著有

詩八卷

崇正志

方以智南京桐城人崇正庚辰進士李賊入京以智孤蹤避

亂德慶後爲僧號無可上人又號木立又號藥地愚者著作

等身詩最悲壯今其子孫最盛云

德慶志

布衣曾和應臨川人主事會亨應弟江西破奉父入閩又走

肇慶遇變投井死

明史

入祀忠義祠

李來字我貽宜與人隨兄用楫赴廣東以永明丙戌選貢授

中書科中書舍人奉命封藩粵西歷官監軍道肇慶失守矢

志恢復合李定國兵圍肇慶戮力行間親冒矢石順治十年

七月爲大兵敗走殉難於德慶州來負異才與兄用楫同誓

以身報國幼聘同里吳氏入廣後道梗不得迎同官有強謀

爲室者來慷慨厲聲曰國士至此何以家爲公等詎欲來全

軀保妻子乎卒不娶年三十有二

李氏家譜節畧

何符聖江西建昌人國學生喬居新興人豪邁博古與海陽陸漢東及邑士潘毓珩甘清芳劉廷輔互相唱和至今嘖嘖人口

陳有惇直隸武進士以陽春守戎改令新興雖非正銓然善撫民多異政去官二十年客遊過新州民猶德之又越數載將歸燕山特臨舊治與紳士話別闔邑贐而餞之多贈詩以壯行色

國朝

孫應機浙江上虞人順治八年僑居新興

並舊府志

連城璧江西金谿人崇正庚辰進士十六年任靈山縣耿介

端方鄰縣巨賊章兒黃應秀越竟流劫繕城池練鄉勇增設
汛兵分險防禦民賴以安建社學勤月課士風丕變擢監察
御史巡按廣東順治十八年謫戍陽春與邑人謝凝之江巖
叟相唱和後偕子推官以謙等寓德慶尋徙新興康熙元年
奉

旨黃冠歸里士類榮之

陽春志

肇慶府志續編

人物

耆壽

高要慕容楠妻陳氏年登百歲道光十一年詳報
恩平從九馮隆緒年百有八歲道光十一年詳報
德慶何嘉圃五世同堂年八十六歲道光十一年

恩賜

匾額綬疋

上俱採訪冊

肇慶府志續編

人物

列女

高要金利村職員黃穎其妻葉氏守節四十年現年六十八歲道光十二年詳報

陽江王亨保妻許氏孀守四十九年現年七十一歲道光十一年詳報

陽江陳相東女阿嬌許字電白黃景光年十九未嫁聞夫訃堅請過門守貞不遂乃自縊死

德慶武生李枝美妻溫氏道光十二年三月詳報

德慶杜蔚文妻林氏道光十二年五月詳報

上俱採訪冊

肇慶府志卷二十終

高要周汝珉校字